

宣
統
新
疆
圖
志

新疆圖志卷六十一

山脈三

又東北曰喀喇巴爾噶遜之山其上多金多銅多鐵

新疆圖說此山原建嘉德城在迪化城東南一百八十里今謂之達坂城新疆識略云烏魯木齊鞏甯城其地卽古車師後王庭其前王庭卽今吐魯番也自烏魯木齊東南越齊克達坂五百三十里至吐魯番爲正道可通車唐書地理志交河縣北八十里至龍泉館又北入谷一百三十里經柳谷度金嶺至北庭都護府地又宋史高昌傳王延德使高昌師子王邀延德至其北庭歷交河城按交河卽吐魯番北庭卽烏魯木齊所云經柳谷度金嶺者當卽齊克達巴罕一帶山也茲查迪化城南往吐魯番路惟達坂嶺可通車其卽當日之齊克達巴罕無疑

辛卯侍行記臘月初五日自白楊站西入峽四里出峽升陡坡又西多黃沙梁登降坎坷三里東北下坡踰乾溝緣沙梁行四

里折北越十餘丈之坡又北多培塿十五里復入峽經溝中石

磧四里溝水淙淙流急不冰繞行曲岸有茂草小樹三里後溝土屋三間茨棘

爲籬行人館焉後溝南七十里小草棚驛又一百里托克遜爲南門大庭北負齊克達坂漢語謂曰達巴字之呼爲達坂天山一

幹也新羅士其里行程記以此爲博克達坂屈曲而登衆車更迭加騾七里至嶺巔小憩旋

下有驛馬已介六里臨峻坂約四十度繫馬車後多人挽之徐降車播不可

坐徒步攀援行行且止八里坂盡出峽道左荒店一家半里下

坂半里涉二澗寬丈餘深三尺有卹墅草木一里半經廢堡約二里開闢所築又渡澗

二崖下有汎卡循山迂繞里半下坂過溝一里石磧中有廢壘

三里折西南二里達坂城驛通化住南門外店街上下四十家計行六十四

里此地舊名喀喇巴爾噶遜蒙古語謂虎城也乾隆四十七年築嘉德城周三里半

同治中陷於亂回光緒三年春大軍由北路進攻以炸礮轟破

雉堞皆平案嘉德城四面皆山有險可扼惟地氣極寒東北百

餘里三角山有銅鑛用緡回三百人淘挖每銅一斤合銀二錢

六分仍不敷經費城西南四十里有鐵鑛新疆仍用俄鐵價廉

質精華人所治工本鉅銷路滯苦於賠累不敢開採

謹案齊克達坂卽七箇達坂西距喀喇巴爾噶遜三十餘里蓋一山也三州輯畧新疆識略皆以齊克達坂爲古之金嶺陶葆廉云新唐志交河縣北八十里龍泉館又北入谷百三十里經柳谷度金沙嶺百六十里經石會漢戍至北庭都護府宋王延德歷交河州六日至金嶺口又兩日至漢家砦又五日過金嶺一日至北庭按唐志交河至北庭祇三百七十里而延德緩行故閱十四日乃至此道蓋今白楊河東北經四道橋之路也和瑛三州輯畧以齊克達坂爲王延德所過金嶺按延德度金嶺後一日卽至北庭唐志金沙嶺距北庭僅百六十里北庭故城在今濟木薩東北余故疑延德所歷係溯白楊河東北四道橋出山卽至濟木薩如以齊克達坂爲金嶺則必西北經迪化折東經阜康乃至北庭是距金嶺六七日與前史所言形勢不合今四道橋之路商人多有行

之者古之金嶺在濟木薩南陶說是也達坂城大路古今不同今日行車之路爲巡撫潘效蘇所修戊申七月遭水冲決又在北廿里外之達坂舊路修築矣達坂城地處兩山之間形勢險要爲南疆門戶同治初年安夷帕霞防官軍南下與白彥虎移達坂新城於兩山間堅厚倍常以大通哈大廳守之又以次子海古拉據守托克遜扼南路總隘亦築兩城相犄角而自居喀喇沙爾爲策應官軍至一鼓而下達坂乘勝進攻遂復南疆耆定後設守備一員防兵一營可以見其形勝矣其山金鑛距迪化城百八十里鐵鑛距城東南二百里又北曰博克達之嶺天山絕頂也其上有雲五色其下有龍湫七箇達坂在其南其陰多銅鐵有草焉狀如芙蓉六十年始花名曰石蓮嗅之頭痛有石焉名曰雲母切之光可以鑑有蟲焉巨身而赤色重數十觔名曰雪蛆其鳥多鸚鵡獸多狒狒木多松柏藥草多黃耆木通知母貝母柴胡白朮茯苓黃連大黃黨參防風甘草

當歸細辛半夏牛膝獨活羌活前胡芍藥遠志川芎附子沙參茺
黃黃柏欬冬黃芩益智之屬其陰庫里葉圖及多倫諸水出焉北
流入於地

西域圖志此嶺在額得墨克達巴西天山最高峯也東南距闕
展二百里高八里山脈自烏魯木齊東南之托克喇鄂拉折而
東北行一百六十里高峯突起爲迪化州境東北一大屏障托
克三郭勒發源南麓多倫庫里葉圖諸布拉克發源北麓乾隆
二十年討準噶爾二十二年追討阿睦爾撒納大兵道出其麓
二十五年西域平軍旅凱旋咸祭告自是秩於祀典每歲春日
致祭魏書高昌傳北七十里有貪汗山夏有積雪此山北鐵勒
界也隋書鐵勒傳大業元年突厥處羅可汗擊鐵勒諸部遂叛
拒處羅立俟利發俟斤契苾哥楞爲易勿真莫何可汗居貪汗
山莫何勇毅絕倫伊吾高昌焉耆諸國悉附之唐書突厥傳咄
陸入寇伊州安西都護郭孝恪敗之咄陸以處月處蜜兵圍天

山而不克回鶻傳西突厥處羅可汗之殺鐵勒諸酋也其下往往相率叛去推契苾哥楞爲可汗據貪汗山案博克達鄂拉在鎮西府西開展北鎮西府古伊州開展古高昌則博克達鄂拉當卽高昌北七十里之貪汗山咄陸可汗自伊州敗還而圍天山宜在此地也北史魏書唐書俱作貪汗山惟隋書作貪汗疑傳寫之訛

西域釋地此山在鞏甯城

卽今通化城

東南二百餘里望之如在目前

三峯峭拔入雲盛夏積雪不消山頂有潭周數十里山腰有潭周十餘里土人稱爲海子山南有俗所謂七箇達坂者卽此山最高處路通吐魯番爲軍臺孔道過嶺凡七上下計四十餘里按唐書西州交河縣北行經柳谷度金沙嶺至北庭都護城又按杜甫詩註自交河北行八十里至龍泉館北入谷百三十里經柳谷度磴沙嶺百六十里經石會漢戍至北庭都護府今烏魯木齊爲唐北庭都護故治吐魯番爲西州故治以相距道里

考之此達坂卽所謂金沙嶺也今嶺畔有陡坡沙子細碎滑馬足金沙瑩沙當謂此

西陲紀畧靈山在安樂城

即今吐魯番城

西北百里卽博克達巴罕之陽

其山最高大土人言此十萬羅漢削髮涅槃處近山有高臺傍有僧寺寺下有石泉林木入山行二十里至一硤硤有小土屋南登山坡坡上有石屋中有小佛像五屋前有池池東有山青黑色遠望披如毛髮土人言此十萬羅漢洗髮處循硤南行六七里高登崖崖下小山疊疊峯巒秀麗羅列成行峰下白石成堆似玉輕脆不可把握堆中有若人骨狀者堅如石文縷明晰顏色光潤土人言此乃十萬羅漢靈骨也又東石崖下石筍如人手足稍南至山坡坡石瑩潔如玉土人言此乃辟支佛涅槃處也周行羣山約二十餘里五色沙石火燄灼人四面峻壁石崖天巧奇絕不可勝紀惟鳥獸絕無耳

三州輯畧烏魯木齊東二百餘里北天山之間突起三峰高插

雲霄削如太華豐下而銳上四時積雪不消上有大龍潭周數十里水清而甘深不可測山之麓有小龍潭周十餘里水盈而流沛然莫禦興雲致雨引水溉田數萬家惟此是賴博克達者蒙古語神靈之謂故俗又名曰靈山將軍兆惠曾望祭於察汗柱爾地方乾隆己卯侍衛努三奏言宜在巴爾哈達肇興祀典自是每歲內頒香帛命都統等以太牢致祭於紅山之上其祭文由禮部撰成頒發乾隆四十八年都統明亮由阜康南山登山至大海子見水口爲大石阻截不能下洩查勘估工約費二千金可以鑿石下注奏明准行爲文致祭開石引流其年灌溉饒足次年五月潭水不至再往履勘則潭水暴落渠口高出水面數十尺又兼天寒無益麥苗經署都統圖具奏停止仍令前都統明亮賠繳所費帑項焉

烏魯木齊雜記寒水石亦名雲母生於博克達山之七達巴揭以糊窗澄明如鏡

靈山天池疏鑿水渠碑記阜康之陽靈山屏列峰勢出沒雲霧中上有天池在焉俗傳此水爲蛟龍窟宅雪掩冰封莫窮所自人欲探其勝者至山麓輒爲風雨所阻余飭騎從自南山口取道而入谿流曲折山徑紆迴林木交陰蔚然深秀穿巖越壑盤旋於松雲翁鬱之間真不減翬叢百折也再登再憩漸就平岡聞水聲潺潺噴薄于斷巖之上者小龍潭也潭水深碧其源弗長然雖流細力微亦足以沾溉近郭從此越崇嶺數層始臻絕頂見神池浩淼如天鏡浮空沃日蕩雲洵造物之奧區也

新疆圖說博克達山在阜康城南九十餘里

謹案博克達山準語神靈之謂故又曰靈山自迪化望之似邇卽之實遙其山四周皆有冰雪環之世稱雪海三峰從雪海中湧出巖削如太華而復絕依附凡人迹所能及如會仙臺柱天石達摩崖福壽寺東嶽廟諸勝皆其支阜其去三峰尙隔二日程窮冰莽雪好事者百計探之不能達其上有龍

湫渤然莫測其深其下建博嶽廟以在府治東故又呼爲東嶽廟也所謂七箇達坂者在其南紀昀烏魯木齊雜記稱根忒克西北峻坂七層最爲險扼番人過者必下馬如見所尊卽此又七十一新疆紀略云雪山在烏魯木齊者爲博克達坂三峯孤峭冰雪晶瑩望之如琉璃世界西陲紀畧亦稱爲博克達巴罕案博克達之山以神靈得名非達巴罕後人不解其義妄增之耳七十一又云

上賜名福壽之山今案迪化府城西有福壽山見諸三州輯略不聞博克達有是稱一統志西域圖志新疆識略諸

欽定書具在皆不言有

賜名福壽之事豈以茲山有福壽寺故傳會其說歟七箇達坂卽齊克達坂三州輯略云齊克達巴罕在烏魯木齊城南二百三十里喀喇巴爾噶遜營東十里山巔崎嶇道途礧礧七上七下四十餘里俗名七箇達坂南通喀喇沙爾大道東

通吐魯番哈密安設軍臺宋供奉官王延德使高昌所稱金嶺疑卽此非也金嶺在今孚遠之南辛卯侍行記辨之詳矣
貪汗山卽天山之切音字三州輯畧云貪汗山在吐魯番北
夏有積雪山陰卽烏魯木齊吐魯番鄉土志云北郊近城諸
山皆黃赤色無寸草三四月間炎熱踰於閩粵然更北遠山
則盛夏積雪相距不百里而寒燠迥殊此卽隋書所謂高昌
赤石山北七十里之貪汗山也蓋高昌北山皆爲天山又轉
爲貪汗山不必定指博克達言也

又東曰達斯達爾之山

謹案此山在吐魯番城東北南山之水流經其下南趨爲沙河子折而西至沙河口入於沙

又東曰黑子爾坦之山無草木吉布庫水出焉北流入於沙

吐魯番鄉土志在達斯達爾山東五十里

又東曰凍度吉爾之山無草木固爾班托博楚克水出焉北流入

於沙

謹案此山在黑子爾坦山東奇臺永豐渠水舊名固爾班托博楚克水

又東曰可洛之嶺有草焉名曰羊刺是其密

吐魯番鄉土志在凍度吉爾東五十里

又東曰克立之山木頭溝水出焉

吐魯番鄉土志可洛達坂又東二十里有山曰木頭溝卽克立山其溝水東經勝金臺折而西流至玉門口二堡三堡之田資

灌溉焉

又東曰阿拉賴之嶺龍口渠水出焉北流分渠溉地

新疆圖說老奇臺龍口渠水在奇臺縣城東南一百三十里其河三源均出阿拉賴達坂北流三十里合爲一水又流五十餘里分爲數渠其正支至老奇臺城分溉莊地

謹案此嶺一作阿拉夾在鄯善縣城西北坎托海嶺西

又東曰坎托海之嶺齊克騰木水出焉東南流伏於草湖

新疆圖說齊克騰木水在闢展城東九十里源出祁連山坎托海達坂曲折東南流一百九十里至齊克騰木驛東又三十里入於草湖

辛卯侍行記云回語齊克騰木得泉水也唐地志羅護西百九十里至赤亭守捉王延德高昌記鬼谷口西至澤田寺竊意赤亭澤田皆齊克騰之本音也

謹案此嶺在鄯善縣城北茂朋山西

又東曰茂朋之山有蛙焉吐冰爲雹名曰蜥蜴東吉爾水出焉西北流入於地

新疆圖說在吐魯番城東北二百四十里東吉爾水在奇臺縣城東一百三十里源出茂朋山西北流五十里又北流三十餘里至東吉爾莊分灌地畝

奇臺鄉土志平定山卽茂朋山在舊縣城東南一百二十里

謹案此山在鄯善縣城東北薩拉海山西

又東曰薩拉海之山白楊河水出焉西北流伏於山溝

新疆圖說上下白楊河在奇臺縣城東二百四十里源出祁連山薩拉海山溝北流二十餘里入奇臺境西北流五十里爲白楊河又二十里伏於山溝

謹案以上九山統名祁連山山海經云天山西二百九十里曰泐山西行百里至於翼望之山郭璞注翼望或作土翠山天山卽漢貳師擊右賢王處天山當指今鎮西哈密境內天山而言其所謂泐山翼望山當卽今闕展北一帶之山如上諸山是也

其支山曰霍同察海嶺

吐魯番鄉土志在廳城西界層巒疊嶂冰雪至夏不消一水出其中東北流入於沙

曰納林奇喇山

西域圖志在蘇巴什塔克西五十里其東谷口在托克三西南九十里山峯最高處爲額爾坤達巴自谷口迤西南峭岸如屏謹案此山當卽舊圖之朔洛海達坂一帶之山其北則烏斯圖果勒及作洛滿苔諸水所出吐魯番鄉土志云其山險峻荒寒人迹罕到卽此山也西與博羅圖山相接

曰蘇巴什山

西域圖志在闕展南自博羅圖納林奇喇諸塔克迤邐東屬經闕展南境踰東界而止爲闕展南屏過此而東南皆沙磧矣其北谷口在托克三西南五十里谷內有兩大石入谷行十里微有水草蓋古車師通焉耆道也唐書地理志自西州西南有南平安昌兩城百二十里至天山西南入谷經礪石磧按唐西州今爲闕展蘇巴什塔克在闕展西南一百七十里唐地理志稱西州西南入谷者當指蘇巴什山谷而言谷內兩大石意卽所謂礪石也又按自托克三西出有二道其一出伊拉里克由阿

拉癸鄂拉入谷口經裕勒都斯以抵伊犁其一經納林奇喇山口踰博羅圖谷口迤南以抵楚輝其一西南入蘇巴什谷口踰庫木什阿克瑪塔克亦抵楚輝

莎車行記十七日蘇巴什臺宿入哈喇沙爾界亂山之中僅有軍台一所臺對一山石骨沙崩高數十仞勢極陡絕回人履沙而登至絕巔挺身直下爭先鬪捷以爲戲疾如飛鳥一瞥到地十八日阿哈爾卜拉克宿軍臺面山如蘇巴什山純石無沙高峻過之臺東北二十里名蘇巴什溝怪石崢嶸纍纍塞路

謹案蘇巴什驛距吐魯番城二百一十里驛卽因山得名西南行七十里至阿哈爾布拉溝左右石壁陡峭高插雲霄中劃一道僅容雙輪逶迤百數十里石徑犖确車如簸箕每當盛夏山水暴發狀如奔馬呼吸間有波臣之歎行者視爲畏途丁未之秋命遊擊張鴻臚鑿平石磴其阻路大石用火藥炸除不似從前之狹逼矣圖志所謂兩大石者當卽指此

曰都魯嶺

西域圖志在交河城西北一百二十里其脈從迪化州東之托克喇鄂拉分支迤邐而東屬於金嶺東西百里有圓澤周數里名鄂蘭淖爾其交流出於嶺谷間乃雅木什以西諸城屏障也按宋王延德高昌行紀歷交河州凡六日至金嶺口又兩日至漢家砦以今形勢證之都魯達巴與漢家砦爲近

謹案此嶺當卽今之伊拉里克山其鄂蘭淖爾卽依拉湖之轉音也山之西南有水東北流瀦爲此湖交河城在今吐魯番廳城西二十三里之雅爾河伊拉湖在城西一百五十里正與圖志所謂都魯嶺在交河城西北一百二十里者里數相合伊拉湖壤地極廣興修水利者多注意於此

曰托克遜山

吐魯番鄉土志城西百二十里曰托克遜山卽夾爾蓋斯山有河出迪化東南流經托克遜城東而南其西一水自托克遜城

西來會又東南潞爲覺洛浣東南流入於沙

曰黑頭山

吐魯番鄉土志城西廿里曰黑頭山雅木什及布幹二水出其下南流至雅木什及城西之督干湖灌注涼州西甯等工莊地

曰覺洛塔哈山

新疆圖說在吐魯番城南二百四十里

曰克子里山產煤

新疆圖說在吐魯番城南二百六十里

曰庫什嶺無草木

謹按此嶺在克子里山南

曰巴什若洛滾山

謹按此山在庫什嶺西南

曰庫什爾嶺無草木

謹案此嶺在巴什若洛滾山西南

曰庫木什嶺

謹案此嶺在庫什爾嶺西南

曰土甲甫哈朗山

謹案此山在庫木什嶺西南

曰哈拉可山

新疆圖說在吐魯番城南六百八十里

謹案此山在土甲甫哈朗山北

曰卡卡蘇嶺

辛卯侍行記吐魯番廳城東南一百三十里魯克沁折南四十里沙白特坎爾西南行三十餘里入覺洛塔克山峽七十里克子里山產煤一名伊格爾達坂回語馬鞍曰伊格爾八十里阿習布拉克言水苦也西南過庫什爾達坂一百七十里烏宗布拉克彌望堅鹵其白如雪中有一水鹹不可飲回語長流曰烏宗西南入孔木達坂

即庫木什嶺

回語沙曰孔木又曰渾六十里帕沙

布拉克井水鹹折西八十里生額爾或名五戶地有池及樹纏
回一家地三十畝半耕半牧六十里阿子杆布拉克轉西踰卡
卡蘇達坂東西連山又名庫圖洛克塔克猶言無水草荒山也
六十里托呼喇布拉克以上七程須馱負淡水冬則熬冰雪以
飲五十里出峽營盤海子周約三十里海西十餘里有廢壘西
南平沙寬廣相傳此處本在澤中爲浣溪河淤沙所壅疑古時
此海與蒲昌海合也西南四十里浣溪河回語曰共奇達里雅
共奇古墓也達里雅河也漢人訛其音曰浣溪河或曰孔雀河
實卽喀喇沙爾之海都河也

曰金嶺魯克沁水洋海水皆出其南麓

西域圖志在闐展北境嶺脈係天山分支自迪化州東境之托
克喇鄂拉東出爲都魯達巴經吐爾番城北東至闐展四百餘
里凡闐展所屬諸城皆以此山爲屏障亦皆藉此山之水導之
繞城以溉田園隋書高昌傳北有赤石山山北七十里有貪汗

山夏有積雪唐書地理志西州交河郡開元中曰金山都督府
宋史外國傳有水源出金嶺導之周圍國城以溉田園作水磴
宋王延德高昌行紀歷交河州凡六日至金嶺口寶貨所出又
兩日至漢家砦又五日上金嶺嶺上有龍堂刻石記云小雪山
也嶺上有積雪行人皆服毛罽度嶺一日至北庭按漢書西域
傳卑陸國治天山東乾當國列傳載曰下卑陸後國治番渠類谷郁
立師國治內咄谷西且彌國治天山東于大谷東且彌國治天
山東兌虛谷切國治天山東丹渠谷狐胡國治車師柳谷考諸
國舊疆卽今闕展所屬之蘇巴什森尼木汗和羅諸境居今嶺
之北者則所謂乾當番渠類內咄于大兌虛丹渠柳谷應卽今
金嶺以北博克達鄂拉東南一帶山谷而乾當于大兌虛丹渠
云在天山東當與博克達鄂拉爲尤近唐書薛延陀傳載契苾
哥楞爲易勿眞莫賀可汗據貪汗山以隋書赤石山北七十里
有貪汗汗之故山之文證之則貪汗山當卽今之博克達鄂拉而

其南七十里之赤石山當卽唐地理志所謂金山宋史所謂金嶺其名至今不易者但考唐書稱自交河縣北八十里有龍泉館又北入谷百三十里經柳谷度金沙嶺則自縣北二百一十里至金沙嶺也延德行紀稱自交河州六日至金嶺口又兩日至漢家砦又五日上金嶺則自交河城十三日行至金嶺也疑當時自都魯達巴至托克喇鄂拉一帶總名金嶺今則專屬闐展諸城之北山矣

謹案陶保廉云纂修西域圖志諸官以連木齊爲漢車師後城長國以森尼木爲漢卑陸國其東北一百里汗和羅爲卑陸後國其西北七十里布拉克爲刼國按漢書後城長在郁立師國之東郁立師北與匈奴接則後城長亦北接匈奴今連木齊之北爲車師後庭是後城長不在此也漢書二卑陸與刼國毗連卑陸後國北接匈奴南接車師則當在車師之北若森尼木汗和羅等地皆在車師東矣吐魯番漢車師

前國

史記作姑師治交河城今越城西十三里之稍合和屯一名惟斯河

狐胡國地以漢書兩國去長安里數

相較則狐胡在交河西五十里以去焉耆里數相較則狐胡

在交河西六十五里漢書云狐胡治車師柳谷新唐地志交

河縣北八十里龍泉館又北百三十里柳谷蓋今廳城西北

迪化東南白楊河等處也今案古之金嶺當在博克達山迤

東爲濟木薩東南一帶之山今則以吐魯番近城諸山爲金

嶺矣西域圖志云魯克察克

加得克

水洋赫

即今

水皆發源金嶺南

麓此蓋勝金台連木齊

即連木

蘇巴什等處之山統名金嶺由連

木齊西行三十二里至蘇巴什

非連木之蘇巴什

又三十八里至勝金口

又七十五里至吐魯番廳城吐魯番鄉土志云勝金台山起

自松山南越噶順沙磧案勝金台本作森尼木或稱僧吉木

回語潮澤也今訛爲勝金台勝金台驛舍今移西二十一里

之呼愛克斯漢人呼爲勝金口陶保廉云登降阨陁左巖右

澗流水淙淙隔岸土屋二三小樹繞之出塞所經惟此處有

幽景而車行較險佳境亦危境也

以上吐魯番境內支山

曰柯柯雅山厥產煤有水焉出峪入於河

鄯善鄉土志在縣城西北九十里產煤山內有水流出口浸入沙內

辛卯侍行記云闕展南皆大戈壁其北九十里柯柯雅爾又北入山經夾皮泉回回溝通木壘河可騎行

曰紅山

鄯善鄉土志在縣城北二十餘里

謹按此山卽隋書所謂高昌北之赤石山也明史火州其地多山青紅若火今吐魯番東北有火山數處恒起煙霧隱現無定蓋煤硫諸礦火也

以上鄯善境內支山

曰托克喇嶺

西域圖志在博克達鄂拉西南一百六十里迪化州東南五十里山脈自哲爾格斯鄂拉東行至此停蓄折而北卽今迪化州東障也

一統志在迪化州東五十里漢書載蒲類國治疏榆谷卽其地謹按迪化州東南五十里當在出羊腸子溝入芨芨槽山口方位俗呼爲塔克山此天山之分支非正幹也徧考迪化東南五十里內外並無正幹之山圖志非也

辛卯侍行記云芨芨槽南北皆山無草木無民居十里升兩坡迤西陂陀迂曲頑石撼輪地名羊腸溝十二里下坡

曰雅瑪里克山

西域圖志在昌吉郭勒西羅克倫郭勒東昌吉縣治西南五十里當孔道南

新疆圖說在迪化城西南二十五里

謹按新疆舊圖雅瑪里克在頭屯河即古焉浞東蓋屬迪化之山此

山爲朱勒都斯之分支蜿蜒昌迪境內統稱爲雅瑪里克故
迪化城西之福壽山訊鮮錄亦謂之雅瑪里克也

曰福壽山其上多蛇虺

三州輯畧在鞏甯城南里許自紅山平斷處平衍二里其南岡
巒忽起蜿蜒西行直赴瑪納斯大河層崖疊嶂其陽則珠勒都
斯山塲也其北復向西南接庫爾喀喇烏蘇南山西至晶河直
抵伊犁皆天山也每見雲霧迷漫夏必雨冬必雪俗稱靈應山
西向建龍王廟一座山腰開渠宛轉如帶疏洩消融之雪水繞
鞏甯城西南北流灌民屯地畝

西域釋地在城南一里許俗名靈應山本名靈應山每山上起雲霧必
雨雪後定今名建塔其上

謹案訊鮮錄云福壽山卽雅瑪里克山由朱勒都斯山分支
東趨二百餘里府城西里許屹然而止案此山俗謂之妖魔
山妖魔者雅瑪之轉音蓋雅瑪里克山直趨東北故通稱也

七十一風土記謂博克達爲福壽山非

曰紅山

三州輯畧在鞏甯城東南三里山高里許周寬數里峭壁懸崖形如蟾蜍昂首南面陡坡直上山巔建玉皇廟一座旁堆鄂博東南爲望祀博克達山之所都統索諾木策凌題額曰上方山每歲四月十五日居民商戶車馬雲屯雜技百工靡不聚集爲塞上一勝會也南北兩路均稱烏魯木齊爲紅廟子本此

新疆圖說北極山今名紅山嘴在迪化城西北五里

謹案此山在舊滿城東迪化城西北西南與福壽山僅隔一路乾隆三十三年八月十五夜昌吉流人殺屯官爲變次日報至時兵皆散屯於外城中兵僅一百四十七人大學士溫福急率之以行至紅山口守備劉德叩馬而諫曰此去昌吉皆平原無險可扼且賊得城必不株守而南界天山北界蒼湖無路可竄其勢當卽來莫如駐兵於此借陡崖遮蔽賊不

知多寡俟其至扼險下擊賊可擒也從之賊至衆鎗齊發馬皆驚逸譟而乘之賊遂殲蓋亦迪化一要隘矣

曰智珠山

三州輯略福壽山在鞏甯城東南平地孤起一峯漫坡高里許上建八蜡神廟文昌殿殿之東南綴以周廊開窗遠眺爲文人嘯詠勝境

謹案此山俗謂之蜘蛛山在迪化西北紅山之西

曰通古斯巴什山

西域圖志在巴爾巴什鄂拉西二十里迪化州境宋王延德高昌行紀北庭北山中出礪砂山中嘗有煙氣湧起無雲霧至夕光焰若炬火照見禽鼠皆赤采者著木底糝取之皮者卽焦下有穴生青泥出穴外卽變爲砂石土人卽以治皮案迪化州爲唐北庭唐北庭宋時山北並隸高昌而北廷之稱不改則所謂北廷北山當屬今迪化州卽烏魯木齊北境之山考其方位宜與巴

爾巴什通古斯巴什諸山相近又隋書西域傳載阿羯山應卽唐書龜茲國北之阿羯田山史亦稱其有煙火出礪砂疑延德所記有不定屬於烏魯木齊北境者或自今之烏魯木齊以西迄於阿克蘇北山皆屬天山正幹地氣積厚當時產吐煙燄有大略相同者是以諸書紀載率多近似不妨兩存之以備考證謹案迪化西北頭屯河之山產石煤質最佳與甘肅鎮番靈州諸煤無異日夜常有煙火當卽王延德所稱之山

曰巴爾巴什山

西域圖志在迪化州城西北三十里

謹案迪化城西北二三十里內之山產炭俗呼爲西山窰省垣所需之炭皆此山所出也當卽巴爾巴什山

以上迪化境內支山

曰額得墨克嶺察罕烏蘇納里特之水出焉均北流入於地

西域圖志在托來達巴西七百餘里闡展北爲博克達迤東之

支峯察罕烏蘇納里特布拉克發源於其北麓

謹案新疆圖說云黃山河亦名察罕烏蘇水在阜康城東南八十里源出博克達山北流分渠灌地大龍口水亦名那拉特水在阜康城東南一百八十五里源出博克達山北流亦分渠入地那拉特卽納里特也此山仍係博克達山特其支峰耳

曰黃山產煤炭有水焉分渠入於地

新疆圖說黃山炭窑在阜康城東南一百五十里小黃山炭窑在阜康城東南八十里

阜康鄉土志大黃山小黃山皆博克達之前山大黃在縣治南少東小黃在東南

謹案察罕烏蘇水今名黃山河據此則大黃山當與額得墨克爲一山

以上阜康境內支山

曰千佛洞山

三州輯略在濟木薩城西南山內距城十餘里入山約行數里重岩疊嶂高下不等樹木叢茂並未見有洞口傳聞自乾隆三十五六年間有濟木薩城內賣菜民人患眼疾逾年不痊將至失明賴熟悉山徑拄杖採柴度日一日入山眼疾遽發痛欲覓死將縊山樹下忽聞人言山下水洗眼可痊如是者三乃匍匐下坡聽有水聲祝曰此必神示如果洗愈誓爲僧坐溪邊掬水洗之痛立止洗一日夜兩目卽能視物登山坡小坐忽見坡土坍裂露白灰牆壁用手刨之有門洞跡因出山告村人攜帶鋤鍬鑿開洞門取炬照之洞形如半月見一臥佛身長丈六金面跣足衣服顏色如新又有銅佛大小不計數自尺餘至三五寸不等其人感泣卽日落髮募錢建廟都統索諾木策凌貢洞中銅佛九尊考宋供奉官王延德使高昌錄云時四月師子王避暑於北庭邀延德凡六日至北庭憩高臺寺又明日引延德遍

遊境內佛寺有曰應運泰甯之寺貞觀十四年造此洞蓋亦唐時高昌舊蹟也

西域水道記保惠城南十五里入南山山麓有千佛洞紺字壯麗山南通吐魯番宋王延德使高昌記云自前庭經雪山龍堂殆由斯路

謹案此山在孚遠縣城西南十餘里小龍口水經其東

曰無量山

孚遠鄉土志城西七十里三臺南面有山名無量山山中有無量佛廟故名其脈來自博克達山時起時伏走入縣境突然高蹙凌雲其下衆山羅列脈分數支遠者三十餘里近者至三臺官道而止

曰照壁山其樹多松榆

孚遠鄉土志縣城南十餘里照壁山脈由吐魯番冰山絡繹而來勢若列屏松榆夾道蓋其分支也

曰紅山

孚遠鄉土志吐魯番冰山之分支距城東南十餘里

曰北沙山

孚遠鄉土志縣治北界科布多山色赭黃童禿無草木

以上孚遠境內支山

曰松山

奇臺鄉土志在本境舊治之南一百餘里爲天山之分支自西南更格爾迤西入境蜿蜒至東南穆家地溝迤東出境綿亙四五百里支峰錯峙隨地異名土人悉呼爲南山其間水源共一十餘處均向北流

西域水道記保惠城東北九十里爲古城其南山曰松山城距山百里

曰哈布山

西域圖志在必濟鄂拉西北四圍皆沙磧東南距鎮西府城四

百里自此西北行與天山北路之拜塔克相接爲準噶爾舊疆
交界處山北六十里卽布拉千郭勒

新疆圖說在奇臺城東北四百一十里

奇臺鄉土志縣城東北至哈布塔克四百餘里與鎮西廳屬之
羊圈灣及札哈沁接壤其路自距城一百八十里之木壘河驛
東北行八十里至黑山頭又東北一百里至闔泉又八十里紅
沙泉又九十里花兒刺自花兒刺以下皆鎮西廳屬地又經戈壁八十里至紙房又折
而西北至高泉亦名紅柳溝從此入山溝西行四十里至條湖
又四十里葦子峽又四十里頭水從此出山溝北行經戈壁八
十里至龍膊子溝卽哈布塔克口入溝行五十里至羊圈灣

謹案嘉慶二十年松筠議於都蘭哈喇山採鉛嗣札哈沁獻
其鉛地長三百餘里廣六七十里東至大哈布山四十里西
至小哈布山百七十里此蓋小哈布山也

曰拜山

西域圖志在鎮西府西北境之哈布塔克西一百十五里山脈自鎮西府北山東行至塔勒納沁之北折而西北行爲阿濟鄂拉又西行爲哈布塔克又西行至此盤迴千有餘里蓋天山分支也烏里雅蘇臺布爾噶蘇臺烏爾圖諸布拉克皆出其南麓按後漢書陽嘉三年夏車師後部司馬率加特奴等千五百人掩擊北匈奴于闐吾陸谷四年北匈奴呼衍王侵後部帝以車師六國接近令敦煌太守發諸國兵及玉門關侯伊吾司馬合六千三百騎救之掩擊于勒山今考車師前後部在博克達鄂拉東天山南北漢時呼衍王近與相接應在哈密西北博克達鄂拉東北一帶是以裴岑誅呼衍王碑卽在哈密庫舍圖達巴而後漢書所謂閼吾陸谷與勒山者亦當在哈密西北博克達鄂拉東北一帶與今之哈布塔克拜塔克哈喇莽奈鄂拉爲相近也特其地難確指爲何山附見於此

新疆圖說在奇臺城北三百一十里

奇臺鄉土志縣城北至拜達克三百里自孚遠驛起出北門東
北行三十里西地又東北行十五里東地又四十里漢溝此處有卡倫
又北行七十里北茨茨湖又九十里老君廟此處有廟又六十里至
拜達克北界科布多屬札哈沁旗南路通哈喇莽奈山案俄人
探得捷走古城之路夏由布倫托海東出哈喇莽奈冬由布倫
托海西以達古城然則後路之防宜早爲未雨綢繆者矣

以上奇臺境內支山

又東曰察罕托羅海之山

西域圖志察罕托羅海猶云白峰也在托來達巴西

謹案哈密西北七箇井頭水諸驛之山卽漢書武帝紀之天
山後漢明帝紀稱白山章懷注作折羅漢寶固傳注說作祁
縣羅漫山折羅漢卽托羅海之變音隋突厥傳稱時羅漫唐
地理志曰折羅漫山薛仁貴傳征鐵勒發三矢殺三人軍中
歌曰將軍三箭定天山壯士長歌入漢關宋史外國傳稱雪

山此曰白峰蓋亦白山之義盛夏有雪故名時羅漫析羅漫又折羅漫之訛字也今出關赴迪化者多由此路

又東曰托來之嶺托來泉水出焉

西域圖志托來達巴在烏可克達巴西三十五里托來布拉克出其西麓東北距鎮西府城今改一百九十五里山脈自西七百余里之博克達鄂拉分支東北行至此當鎮西府西南境

謹案蒙語托來免也卽今之陶賴由七箇井東行一百里陶賴井又東六十里上肋巴泉七十里蘇吉九十里鎮西廳新疆圖說云五羣馬廠在陶賴達坂地方距城西南二百餘里又東曰烏可克之嶺

西域圖志在和洛圖達巴西五十里當孔道東北距鎮西府城一百五十里山脈自西三十五里之托來達巴東行至此山徑稍夷可通南北俗名西打坂

謹案蒙古語烏可克小櫃也下嶺入兩崖間左右偪仄境若

深藏故名新疆舊圖列烏可克嶺於陶賴井之西大誤康熙五十四年肅州總兵路振聲奏沙泉西北九十里有山名無克克嶺其下卽巴爾庫爾山上遠瞭甚明臣移營於此卽此嶺也陶保廉謂卽瞭墩非也

又東曰和洛圖之嶺

西域圖志在阿勒札噶勒鄂拉西五十里蒐濟西南當孔道東北距鎮西府城一百里山脈自西五十里之烏可克達巴東行至此稍折而北

謹案蒙語和洛圖遠也蒐濟卽今之蘇吉驛驛距廳城九十里和洛圖山蓋當今哈木爾嶺之地鎮西東龍口水出其北麓流二十里合西龍口水至蘇吉莊分灌地畝哈密頭道溝水二道溝水均出其南麓南流三十餘里入於沙

又東曰庫舍圖之嶺南通哈密東北瞰喀爾喀西達開展古城其樹多古松煎膏食之令人長壽其花多雪蓮其草多一枝蒿招摩

多之河經其下西流入於巴爾庫勒淖爾有唐碑焉觸之則大風雪其上多木客或曰雲陽之精

西域圖志在塔什達巴西奎蘇東南六十里西北距鎮西府城一百五十里山脈自烏可克達巴東行三百里至此卽巴爾庫勒南山山徑稍夷爲南北通行之道俗名東打坂與西打坂東西相望度嶺北行十里爲招摩多

漢書名

自哈密東北行五十里

爲南山口卽山南入嶺處上有唐左屯衛將軍姜行本碑雍正十一年將軍查郎阿開南山連道經數十折達於山頂唐書姜行本傳高昌之役爲行軍副總管出伊州距柳谷百里依山造攻城增損舊法械益精其處有漢班超紀功碑行本磨去更刊頌陳國威靈遂與侯君集進平高昌按庫舍圖達巴譯言碑嶺姜碑現存是嶺以碑名無疑也舊一統志謂卽侯君集平高昌後紀功碑仿資憲勒燕然意不在高昌國都然考唐書太宗紀貞觀十三年十二月壬申侯君集爲交河道行軍大總管伐高

昌十四年八月癸酉克高昌侯君集傳高昌平君集刻石紀功
還據此則君集刻石紀功當在八月癸酉克高昌後今碑嶺之
碑石刻六月辛卯可知其非一碑且文中但著出師之盛未陳
凱捷之功更以姜行本傳磨班碑更刊頌之文證之所謂依山
造械者正與碑文伐木殫林公輸比妙諸語相合則此碑之建
應在伊州造械時進平高昌以前是侯君集平高昌紀功當別
有刻石未可云卽屬此碑而當時紀功之碑亦未必不立於高
昌國都也

一統志碑嶺在哈密城北往巴里坤軍營必由此土人名闕石
圖謂碑嶺也上有唐碑文多剝落尙存侯君集領十四萬軍等
字

西域釋地松樹塘嶺北面最陡峻盤旋行三十餘里始至其巔
上建關帝廟廟西數十步小峯頂有唐貞觀十四年碑大書大
唐左屯衛將軍姜行本勒石之紀文十五字於碑額拓頗不易

近有作僞者文字舛劣可歎按紀文達筆記云侯君集平高昌碑在嘉峪關外闢石圖嶺脊守將砌以磚石不使人讀云讀之則風雪立至屢試不爽然則此本乃後人轉摹別刻者矣又有漢永和二年隸書碑此碑舊在山巔恐風雨剝蝕移建巴里坤北門外關帝廟中

西陲紀畧巴里坤南山老松高數十尋大可百圍蓋數千載未見斧斤物也其皮之厚者尺許向有攜以入內地者特以罕覩示奇然未知主治置之茶肆中肆者雜入茶內飾色而售隣媼弱病久不愈日買茶而飲焉未幾病如失詢之肆者具以實告於是知松皮之爲功懋矣帥府令人就山斫而煉爲膏凡皮一車可得膏一盞費工力一晝夜需薪無算醫院劉裕鐸邵正文參定主治十二症刊而布之大要皆治血症而於婦人爲尤宜然性最熱用可數分耳

西域水道記自奇臺縣東南行三十餘里入山山中東行三百

二十里爲色畢溝又東行六十餘里爲噶順溝又東行百五十

餘里爲肋巴泉山勢乃開南北分趨二百六十餘里而復合迴

抱周匝如環城墉中爲平川廣輪八百餘里其間諸水瀦爲巴

爾庫勒淖爾回語謂有爲巴爾謂池爲庫勒始因水以名地曰

巴爾庫勒今之巴里坤繼因地以命水曰巴爾庫勒淖爾淖爾當川

西偏其東南隅山曰庫舍圖嶺山脈自烏可克嶺東行三百里

至此卽巴爾庫勒南山山巔有關壯繆祠祠東三十餘步有石

室皮唐姜行本碑土人言碑至神異相戒不得揭揭卽致大風

雪斷行人余庚辰二月經祠下親揭一通祠東二里爲菩薩溝

又東南十三里爲羊圈溝其地置營塘自此層折而下東南行

三十五里爲煥彩溝煥彩溝三字立石路側理藩院筆帖式正

書填以朱其石亦漢碑石之陰隸書四行首行曰惟漢永和五

年六月十五日以下二行曰臣雲中沙南侯餘皆不可辨識煥彩

溝又五里爲南山口營塘自羊圈溝以東水南流成河由煥彩

溝經營塘之西出山又南行二十餘里遇沙而伏羊圈溝以西
衆山出泉會而成河北流經庫舍圖嶺下由柵門之東出山是
爲招摩多河柵門者斥堠所也自松樹塘並山東南行十四里
南入山口一里有木城中置門如關幾察非常謂之柵門元耶
律楚材以丁亥九月過夏國新安縣詩云昔年今日渡松關注
西域陰山有松關見俱然居士集疑卽此柵門也又柵門東行渡招摩多
河乃層折而上五里至二層台又旋折歷磴道廿四級雍正十
一年大將軍查郎阿命兵部員外郎阿炳安所鑿衛以朱欄映
帶流水青松白雪自然明麗磴道盡乃至關壯繆祠旁祠當柵
門正南舉目可見盤折而上十有五里在暑亦雪尤艱行旅招
摩多河卽穿柵門東埔出西北流十餘里經石佛寺南石佛者
掘地所得於此置寺土人以爲唐時造像河又西流數里經沙
山南有松樹塘水入之松樹塘卽庫舍圖嶺口之山萬松叢立
四時鬱青熱地異行記略云松有二種曰紅松曰白松
白松四季長青紅松換葉至五月初始發新枝於此置營塘洪先輩亮吉經

此作萬松歌松皮可煎爲膏山中雪深處生花曰雪蓮又產草
曰一枝蒿營塘南半里有泉發山半亂石中懸坡下經塘西數
十步塘之東二里亦有泉發山半又東六里有水發山澗皆北
流匯爲松樹塘水又西北流入於招摩多河河又西流入淖爾
東歸日記二十六日至松樹塘一路近山行走愈近愈妙雖係
山陰而山頂雪厚日光照耀半山以下松樹聳翠千重萬疊此
山直接伊犁天山一脈石骨嶙峋草綠如茵流泉百道野花爛
發異香襲人極壯游之樂事對面山脚下有沙坡一段獨無青
草橫長數十里相傳唐時營盤爲沙所壓至今營間金鼓聲二
十里由山脚行十餘里曲折盤旋而至山頂關帝廟三層深巖
幽邃旁有小屋庀唐貞觀十九年姜行本紀功碑看則風雪立
至余丙戌九月杪過此曾進屋內一看碑約四五尺高字字清
楚不甚奇異出屋頃刻果起大風雪花飄飄旋即放晴今年二
月望前伊犁領隊大臣某過此必欲看碑廟祝跪求不准強進

屋內未及看完大風忽起揚沙走石某驅馬下山七十里至山下館店大雪四日夜深者丈餘馬廠官馬壓死者無數行路不通文書隔絕數日吁真不可解也旁有福郡王碑一座乾隆年間立徐星伯太史松有題關聖廟一聯又巴里坤有天山巖城岳臺岳臺大將軍駐兵山上尖山鏡潭黑溝新宮諸景中惟岳臺最雄傑前有八陣奇門兩旁能容萬馬黑溝去城三十里路難行一入山內豁然開朗蒼崖絕壁樹木千章飛泉瀑布琪花瑤草別有洞天惟高處不勝寒風雪無常巖城卽海市蜃樓天陰則現亦奇觀也龍王廟獨有柳樹他處絕無故有煙林之勝

新疆圖說天山古名祁連山在哈密城北一百三十里

謹案庫舍圖洪圖作闊什特將軍查朗阿開此山運道在雍正十一年癸丑漢唐行軍多在此山左右

國朝兵征西域亦以此爲進取之基所謂中權制勝者也

又東曰塔什之嶺鞭桿之河出焉西南流注於賽巴什湖

西域圖志在必柳鄂拉西北三十里呼濟爾臺之東南鞭桿河出其南麓

謹案呼濟爾臺今作胡吉爾太在哈密城北一百七十里賽巴什新疆圖說作蔡巴什鞭桿河作塔平河此與塔勒納沁城北之塔什嶺東西通一山也

又東南曰必柳之山必柳之泉出焉其獸多羆

西域圖志在雅爾瑪罕鄂拉西南百里必柳布拉克出其南麓一統志在鎮西府城東南二百里必柳泉出其南麓

謹案此山在哈密乞干淖爾之北

又東曰大羊頭之山

新疆圖說在哈密城東北一百九十里

又東北曰雅爾瑪罕之山

西域圖志在塔勒納沁鄂拉西一百五十里圖古里克之南西北距鎮西府城三百里山脈自庫舍圖達巴東行二百里至此

峯巒峻拔

謹案新疆圖說土古魯卡倫在哈密城東北三百三十里卡南阿里鐵洛可山在哈密城東三百二十里當卽此山之異譯也土古魯水二源均出阿里鐵洛可山北流一百八十里至開毛湖分灌營地土古魯卽圖古里克也

又東曰塔勒納沁之山其北四十里曰雪蓮坪

西域圖志在塔勒納沁城南星星峽北二百五十里西南距哈密城四百五十里塔勒納沁郭勒分出於其南北麓爲二源其北四十里有雪蓮坪相傳雪蓮產此者佳山脈自葱嶺分支迤東而來至此爲天山東盡處由是歷嶂西行入鎮西府界峻嶺層沓亦屬天山之尾閭宋王延德高昌行記載自夏州歷樓于山都督山唐回鶻之地又經馬騾山望鄉嶺嶺上石龕有李陵題字處然後歷伊州伊州爲今哈密則樓于都督諸山當在今哈密東南境上

謹案新疆圖說載塔勒納沁城東西皆塔什山塔什山亦名阿克塔什坦又名庫巴申圖嶺在哈密城東其所出之水曰塔勒納沁河曰太陽溝水曰尖山子水曰什阿拉水曰大天生圈水曰頭道溝水曰照壁溝水曰烏拉臺水庫巴申圖所出之水曰乞干淖爾曰黑其瑪克水曰哈密河天山自葱嶺分支出疏勒之北東經烏什溫宿伊犁庫車焉耆迪化吐魯番鎮西哈密綿亙數千餘里至塔勒納沁而止故卽其地名塔勒納沁山其實皆塔什山也三州輯略云天山行至巴里坤之東名鹽池山即塔勒納沁山截然而止伏入地中千餘里至嘉峪關外沙州之東突兀起頂東行爲祁連山案祁連山實自南山一支分脈伏地再起之說不敢信爲必然西域圖志謂天山自巴里坤分脈北行而西北至阿爾臺山有龍象回顧之勢攷巴里坤西北山勢斷續起伏沙磧之中實不能結此大山魏源北幹考謂阿爾臺山之脈由伊犁博羅塔河之西遶

額爾齊斯河宰桑泊之東北而起阿爾臺山其說近是但就里數長短以阿爾臺山爲天山正幹哈密巴里坤爲分幹則一家之私說也

其支山曰合塔乎可拉山有水焉南流伏於地

新疆圖說在哈密城西北一百三十里八道溝白楊溝水出其南麓均南流三十里伏於戈壁

曰而洛可洛山有水焉南流伏於地

新疆圖說在哈密城西北一百三十里七道溝水出於此山南流三十里伏於戈壁

曰沙克拉山

新疆圖說在哈密城西北一百五十里

曰截嶺

謹案截嶺在哈密城西北沙克拉山之西三道溝四道溝之水出其南麓截達坂卡倫在城北三百里

曰空多洛山

新疆圖說在哈密城東四百八十里

謹案此山在塔勒納沁城東北其東卽鹹水峽其西卽三箇達坂蓋亦塔什嶺之尾閭也東與喀爾喀札薩克圖汗界

曰阿特斯山

新疆圖說在哈密城東北六百里與喀爾喀札薩克連界

曰坤登圖山

新疆圖說在哈密城東北二百八十里

曰阿克桐木山

新疆圖說在哈密城東北二百三十里

曰于里洛山鹽池水出焉

新疆圖說在哈密城東北二百餘里鹽池水源出此山東南流三十餘里經達子溝入錫喇淖爾

曰星星峽是星星石有馬焉往來山中名曰神馬

西域圖志在哈密東南四百九十里南距安西州屬之馬蓮井七十里迤邐東北行四百五十里爲西黃蘆岡峽在沙磧中接安西州境

荷戈紀程星星峽間於山峽陰氣森然居民僅九家聞峽之西有魑魅自建關聖廟邪魔漸遁過客皆於廟中留香火資有捨兩馬於廟者遂爲神馬一往各山自覓食朔望一至廟一每日自赴村店有過客餒馬卽與同槽食飽且自去今往來僕御咸知之見馬來食遂喜以爲神佑云

謹案此峽在哈密城東南五百二十里爲甘肅新疆分界之處峽路崎嶇雍正間大軍駐哈密因轉餉始稍稍修治之有饋餉修路碑記山麓有古回紇墓相傳唐大將某西征俘回紇七人歸其一歿於途葬此後屢著靈異好事者爲釀金建屋覆其壘至今回漢經過必拜之祈輒應匾額充棟亦有施錦障墓上者五色跣躄年久積至尺許壘後怪石穿空凹凸

崎嶇橫亙數十步距此五里許山麓產白黑星星石

即石英大者佳呼之爲水晶於

作身疑非此物也

戟芒圭角儼若削成土人以鋏掘取跗萼相銜大小闊

狹皆視下鋏時以爲銜其面則頑劣雜石翻轉用之瑩潔可愛以作筆格頗不俗又此石能催生磨水飲之立產嗣祠案前星星石一座高二尺精光燦燦至是舍車而徒步下峻坂乃登車初山巔峻絕過者數折輪損人畜劉襄勦錦棠撫新始磬新路里許然石骨嶙峋終不可平行者至此必徒步以防意外故勒碣以戒過客焉

日氣丙嶺

新疆圖說哈密東南至氣丙達坂五百六十里與安西州連界謹案此嶺在星星峽之東

以上哈密境內支山

日月宮臺山

新疆圖說在鎮西廳城南門外十里

曰沙山

西域水道記沙山長十許里牧馬者入山深處夜聞鈴鐸音相傳昔覆軍於此後漢書西域傳呼衍王將三千餘騎寇伊吾伊吾司馬毛愷遣吏兵五百人於蒲類海東與呼衍王戰悉爲所沒沙山正蒲類東也招摩多河流經其東北

謹案沙山子在松樹塘東石河子三羣馬廠夏秋間移牧沙山子鎮西大河一名水磨河一源出沙山南曰柳條河一源出沙山北曰招摩多河西流四十餘里合爲一河又十里至沙山子莊距城一百一十里伏流三十餘里至三縣戶莊北草湖中湧出是爲大河入巴爾庫勒淖爾

曰阿勒扎噶勒山

西域圖志在庫舍圖達巴西北東南距鎮西府城八十里山脈自西五十里之和洛圖達巴東北行綿亙百餘里與鎮西府北境哈套察罕哈瑪爾阿達爾干諸山相接爲天山之分支

日鄂什奇山

西域圖志一名獨山子卽阿勒扎噶勒鄂拉支峯在巴爾庫勒
淖爾南十五里

一統志在鎮西府西南十五里

謹案鄂什奇今圖作鄂什希卡倫在鎮西城西五十五里再
西卽獨山子一統志謂山在鎮西西南十五里者誤

日哈套山

西域圖志在阿勒扎噶勒鄂拉西西里克拜城東北東南距鎮
西府城一百八十里山脈自西來南接托來達巴東行爲鎮西
府境北屏

日察罕哈瑪爾山

西域圖志在哈套鄂拉東巴爾庫勒淖爾之北南距鎮西府城
四十里

一統志在鎮西府東北四十里

謹案蒙古語哈瑪爾鼻也俗語以山梁爲山鼻土人以山名海故巴爾庫勒淖爾又稱哈木哈瑪爾淖爾也

曰阿達爾干山

西域圖志在察罕哈瑪爾鄂拉東一百六十里舊木城之北阿拉克椿濟郭勒流其東西南距鎮西府城二百里

謹案新疆圖說北木城卡倫在鎮西城北九十里山蓋在木城北百里外也土人呼爲木城達坂

曰庫克托木嶺

西域圖志在阿達爾干鄂拉東哈喇和屯之西北山脈自哈套鄂拉東行爲察罕哈瑪鄂拉又東爲達爾阿干鄂拉至此又東北行五百餘里踰鎮西界入於沙磧漢書武帝紀天漢二年貳師將軍出酒泉與右賢王戰於天山注晉灼曰在西域近蒲類國去長安八千餘里師古曰卽祁連山也匈奴謂天爲祁連今鮮卑語尙然後漢書明帝紀永平十六年遣奉車都尉竇固出

酒泉伐北匈奴破呼衍王於天山十七年遣奉車都尉竇固駙馬都尉耿秉騎都尉劉張出敦煌崑崙塞擊破白山虜於蒲類山遂入車師注河西舊事曰白山冬夏有雪故曰白山匈奴謂之天山過之皆下馬拜去蒲類海百里之內魏書高車傳彌俄突與蠕蠕主伏圖戰爲伏圖所敗西走三百餘里伏圖次於伊吾北山唐書地理志伊州伊吾縣有折羅漫山亦曰天山案漢貳師將軍與右賢王戰於天山出酒泉而近蒲類國今之鎮西府卽舊巴爾庫勒爲匈奴東蒲類王茲力支地則此天山應在鎮西府境也漢敦煌太守裴岑誅呼衍王碑刻現存竇固破呼衍王於天山在唐伊州北擊破白山虜遂入車師在蒲類海百里之內唐伊州爲令哈密及鎮西府漢車師爲今吐魯番是竇固破虜之處當在伊州之南車師之西所謂天山白山者自今托來嶺至塔勒納沁山東西綿亙之山皆是哈密及鎮西漢爲伊吾廬地於魏入蠕蠕則魏書所謂伊吾北山卽指伊吾廬北

境之山可知唐書稱折羅漫山亦曰白山蓋一天山而古今異名者云在伊吾柔遠北則亦不外哈密卽鎮西境內矣又按舊一統志於哈密境內載有但密山據元和志山北廿里正抵蒲類海之文謂但密山在哈密東北而以元和志所稱繞海多良田漢將趙充國屯者爲無據今考充國傳前征匈奴後征先零羌屯田係征羌時事先零羌居西域之南充國屯田以隔絕羌胡在北祁連山之南決無北踰天山而屯於蒲類之理又元和志稱但密山在納職縣北百四十里唐書納職縣以鄯善故城置在玉門關西則元和志所云蒲類海當卽蒲昌海境與南羌相近充國所屯宜在於此而但密山之不在哈密境內可知也

一統志在鎮西府西北

曰于里格山

謹案此山在鎮西廳城東北二道柳溝莊之東莊在城北一百四十里

日必濟山

西域圖志在庫克托木達巴北一百二十里地當孔道南東北踰山至華烏里雅蘇台折而西北行二百餘里爲古爾畢達巴入天山北路界

一統志在鎮西府西北當孔道入伊犁界

謹案雍正十年大學士伯督巡陝甘經畧軍務鄂爾泰奏言賊於八月初五日在北路額得尼昭爲我兵所破自鄂爾坤河源推河遁按逆賊敗走畢濟一帶中間有袞塔瑪哈戈壁乃畢濟要隘去巴里坤不過三百餘里今考畢濟卽必濟袞塔瑪哈戈壁卽北山外蘇海圖地方

日阿濟山

西域圖志在必濟鄂拉東北百里當孔道南通哈喇和屯百里一統志在鎮西府西北四百里

以上鎮西境內支山

新疆圖志卷六十二

山脈四

南山之首曰烏仔別里之山

帕米爾山水道里記此山土人指說不一有謂爲木子可爾者有謂爲克子別里者更有指在瑪爾堪蘇之烏赤別里者皆非也中俄止界處所按照圖約及山水形勢考測確在本圖所繪地位無疑俄人謂卽黑仔吉牙克或其邊民嘗以是呼之異地同名事所恒有然必併在梁上不得以圖約中有克則勒吉業克字樣

克則勒吉業克又名克子別里市因以克則勒爲紅色吉業克爲白石一說別里爲小嶺克則勒吉業克者言紅長石一嶺也誤認分支東下及麓牽

混中國設卡之黑孜吉牙克地方顯背同指山梁爲界之約再據押圖細考紅綫止處恰在哲理威河東北第一支分水源頭足見中俄未段界址以此水分亦卽以此水止充足執爲烏仔別里山豁非黑孜吉牙克鐵券

疏附鄉土志烏仔別里距城六百四十里東北至喀喇租庫六

十里

謹案此山土人呼伯什別里在和什庫珠克東南二百四十里東距喀什噶爾八百九十里東南至讓庫爾一百八十里考帕米爾北界一自烏仔別里山起順大嶺梁經由倭伊巴勒孔阿里木圖阿哈比爾卻和太喀喇蘇沙各達坂係布魯特與住布倫庫爾木吉黑纏交界舊址亦卽喀什噶爾道舊管南界一自烏仔別里山起西南順大嶺梁經由哲里威與阿克巴依塔爾兩河分水處過塞勒子巴哈瑪爾濟奈西南至塔什庫爾干爲止本布魯特與什克南交分舊址亦卽約圖中俄界轉向西南之山幹帕米爾東界自喀喇蘇沙西南砂嶺分水處起北界卻和太達坂南至克克突聿克達坂係布魯特與莎車屬塔齊克部民交分舊址亦卽喀什道舊管西南及正西邊界內所經之喀因噶爾別爾解西新底不伊克克里克等達坂支幹紛歧起伏不一其界綫係取正嶺梁

分水爲界帕米爾南界自克克突聿克達坂起至伊阿伊里與喀喇岡蓋兩山梁交會盡頭處下山至愷里對宛順南流水至波咱拱拜上山經阿企克庫伊里克兩達坂再須搶庫爾南之大嶺由乙更阿拉魯水口過海里果什至庫爾帖節克山係布魯特與瓦罕什克南兩部落交分舊址其自克克突聿克達坂以東所有倭海及慈明鐵蓋兩達坂係當日與坎巨提舊有界限亦卽喀什噶爾道舊管不與帕界相涉帕米爾西界無多取布勒滿山北之伊克瑪爾濟奈水南接庫爾帖節克北交塔什庫爾干兩山梁爲界亦係布魯特與什克南交分舊址帕米爾地縱橫八百餘里喪於沙大臣之一言致啟英俄兩國之爭鷸蚌相持至今未決籌邊者宜豫爲桑榆之計也

又按漢書西域傳三十六國南北有大山其山南東出金城與漢南山屬焉自玉門陽關出西域從鄯善傍南山北波河

西行至莎車爲南道西域圖志云漢時所謂南山者皆自葱嶺分支其北山由疏勒尉頭溫宿龜茲焉耆車師六國東行卽今喀什噶爾阿克蘇庫車喀喇沙爾闕展一帶北境之山其南山由西夜莎車于闐扞彌戎廬精絕鄯善諸國東行卽今葉爾羌和闐之南入砂磧歷安西州敦煌玉門縣南境之山漢書武帝紀貳師將軍出酒泉與右賢王戰於天山師古曰卽祁連山匈奴謂天山者指北山而言若西域傳所云東出金城與漢南山屬又從鄯善傍山西行爲南道者止稱南山隋書載福祿縣有祁連山而晉書地理志載張祥以敦煌郡爲商州張元靚以商州爲祁連郡唐書福祿縣東南一百二十里有祁連山乃以近南山而被名於是南山亦號天山與漢時之以北山爲天山者同曰祁連而實分兩幹也今西域回部諸國皆在南山之北卽漢書所謂南有大山也東至涼甘肅州皆與此山爲一脈卽漢書所謂與漢南山屬也自

安西州境外西南行綿亙沙磧直抵葱嶺卽漢書所謂從鄯善傍南山北波河西行至莎車爲南道者也茲本漢時之舊以北山爲天山而於三十六國南境之山止稱南山庶幾稱名近古而彼此不淆一統志旣稱南山在安西衛南五十里又稱雪山在安西柳溝二衛南蓋以一山分支各就所隸之境而言其實未嘗有兩山耳

又東南曰倭伊巴勒孔之嶺有水焉東流入於木吉河

帕米爾山水道里記此山東北距喀什噶爾八百三十里東南接讓庫爾爲喀什道舊管內地界

又東南曰阿里木圖之嶺阿里木圖水出焉東北流入於雅滿雅爾河

帕米爾山水道里記此嶺東北距喀什噶爾七百三十五里西南接讓庫爾爲喀什道舊管內地界

又東南曰阿哈比爾之嶺

帕米爾山水道里記此嶺東北距喀什噶爾五百七十里西南接讓庫爾爲喀什道舊管內地界

又南曰卻和太之嶺

帕米爾山水道里記此嶺東北距喀什噶爾五百八十里西南接讓庫爾爲喀什道舊管內地界

又東南曰喀喇蘇之嶺有水焉北流伏於戈壁

帕米爾山水道里記此嶺分水處東北距喀什噶爾七百四十五里西接讓庫爾爲喀什道舊管內地界

又東南曰喀因夏爾之山有水焉東流入於賽里河

帕米爾山水道里記此山口北距喀什噶爾六百八十里西接帕米爾界爲喀什道舊管內地界

又東南曰別爾解西之山

帕米爾山水道里記此山口北距喀什噶爾七百八十五里西接帕米爾爲喀什道舊管內地界

又東南曰申干之嶺

帕米爾山水道里記新底達坂北距喀什噶爾八百八十五里西接帕米爾爲喀什道舊管內地界蒲犁鄉土志城西六十里達申干卡層嵐疊嶂土民稱爲西山卽往俄國要道

謹按申干卽新底或作新干游擊張鴻疇云由蒲犁城至申干嶺八十里以蒲犁東距莎車府城八百里計之則廳城至嶺當八十五里也

又南曰丕伊克之嶺有水焉東流注於賽里河

帕米爾山水道里記此嶺北距喀什噶爾一千一百五十里西接阿克蘇阿克塔什爲喀什道舊管內地界

謹案丕伊克一作坯一克亦作排克其山有草可牧勘界公牘云色勒庫爾即今城南行一百九十里至和家克巴依卡向西南進山口一帶爲塔墩巴什六十里至丕伊克山口轉向西北行八十里至丕伊克達坂

又西南曰鐵克里滿蘇之嶺有水焉東北流入於賽里河

謹按此嶺爲喀什道舊管內地界西通阿克蘇阿克塔什

又西南曰克克突聿克之嶺有水焉東北流入於賽里河

帕米爾山水道里記此嶺東北距喀什噶爾一千二百八十五里西北接帕米爾爲喀什道舊管內地界

謹案此嶺一作可克土魯克一作可可特勒可有草可牧

又西南曰阿格吉勒之嶺其東巴格志之泉水出焉東北流入於賽里河

帕米爾山水道里記此嶺東北距喀什噶爾一千二百七十里西南接瓦罕爲喀什道舊管內地界

謹案此嶺一作倭海及葱蒲犁廳圖作瓦罕吉爾英人楊哈斯班游記作瓦呼羅特有草可牧

又東南曰克里克之嶺有水焉北流入於賽里河

帕米爾山水道里記此嶺北距喀什噶爾一千二百八十五里

南接坎巨提爲喀什道舊管內地界

謹案克里克一作克列克勘界公牘云由明鐵蓋阿格嘴向西行七十里轉向正南進山口至克里克達坂通坎巨提仍折回向西行二十里至克克突聿克阿格嘴轉向西南行六十里至阿格吉勒達坂山梁稍東一海子通瓦罕

又東南曰明鐵蓋之嶺有水焉東北流入於賽里河

帕米爾山水道里記此嶺北距喀什噶爾一千二百四十里南界坎巨提爲喀什道舊管內地界

蒲犁鄉土志此嶺在城南二百六十里再南行一百餘里有穆斯塔格山均極險峻由坎巨提入境要道也

謹案勘界公牘云由丕伊克山口向西行七十里至明鐵蓋阿格嘴向正南行一百里過明鐵蓋達坂通坎巨提纏回謂山逾千尺者曰明鐵蓋許圖作明塔曼

又東南曰紅孜納普之嶺有水焉北流入於賽里河

謹案此嶺一作渾居拉普許圖作渾楚鄂帕有草可牧南通坎巨提勘界公牘云和家克巴依卡南行一百四十里至它斯曼有塔齊克游牧數戶一百二十里至乙壘沿河一帶草足薪缺轉向西南行六十里至紅孜納普達坂蓋北距蒲犁城五百一十里也

又東南曰星硤之嶺有水焉北流入於澤普勒善河

謹案此嶺許圖作烏帕朗卽帕米爾達坂英人楊哈斯班遊記作土穆沙落內有草場可牧坎巨提人砌有小石房三十間以爲牧養歇宿之所勘界公牘云由色勒苦木什布拉可東南行九十里至星硤阿格嘴

英人遊記作烏格木摩訶

柴草均足向南行五

十里至星硤卡倫坎巨提尾卡設駐於此卡外深溝一道約深十餘丈寬五六丈曲折而下盤旋而上極險要卡門啟閉無人由此轉向西南行約六七十里至星硤達坂通坎巨提後部此嶺東流折而北流之水與阿格里嶺西北流水會於

星硤阿格嘴入澤普勒善河其由葉城縣向西南歷庫庫雅卡越英艾達坂渡澤普勒善河向東南轉正南折西南至星硤達坂計程一千二百餘里議者謂托和奈克通庫庫雅之道爾帶克沙的通怕合浦之道八札塔拉通喬堡之道此三道草柴均足若築堡設卡於此可扼坎部由星硤各達坂入葉城之道案自星硤以西通坎部諸山統名曰穆斯塔格自卡拉胡魯木以東通條拜提諸山統名曰哈喇科隴卡拉胡魯木謂冰山也哈喇科隴或作哈喇昆侖蓋由昆侖得名

其支山曰哈喇山

西域圖志齊齊克里克達巴在哈喇塔克東南一百里英吉沙爾廳圖哈喇達坂東北距城三百一十里與蒲犁界

曰齊齊克里克山

一統志在克什噶爾西北

新疆圖說在沙車州

今改

城西南八百餘里托布倫河經其南

謹按此山爲英吉沙爾及蒲犁之分嶺當孔道北準語齊齊克花也里克多有也一統志謂喀什噶爾西北北當爲南字之誤西域水道記云僧格喀巴布山當和闐正南過和闐西北趨千六百餘里發爲齊齊克里克嶺此蓋以岡底斯爲昆侖發脈也

曰鐵列克山塔斯滾

一統志作提斯滾

及排斯拉巴特兩水出焉

新疆圖說塔斯滾水在英吉沙爾城南一百里其源出坎科布魯特部落鐵列達坂東流爲夏納斯渠分溉城南各莊田畝排斯拉巴特河亦出鐵列嶺東流與澤普勒善河會

謹案西域圖志云特勒克達巴在齊齊克里克東百里一統志云特勒克嶺在葉爾羌西北當孔道北特勒克爲鐵列克之變音新疆圖說云鐵列克卽特拉克蓋一山也山南卽蒲犁境托布倫河過之此山乃由齊齊克里克東北分支東南卽黑子爾鐵里牙諸山一統志所謂在葉爾羌西北也

曰阿合買提山其下多鐵

英吉沙爾鐵礦圖說此山在治南一百一十里有塔什渾河即塔什渾河由鐵列克山迤邐而東至阿合買提山建瓴而下分漑城南各莊河岸之南有鐵礦其基較河堤低二十餘丈脈分五條相距五六里不等縱橫浮現長約七十里寬約十數里附近之依克孜牙莊設爐提鍊得鐵百分之二十或百分之五現有苗洞十數處深者丈餘因運道不便煤炭亦艱故多折本中止

曰杭阿喇特山當孔道北

西域圖志在特勒克東一百里又東南行接葉爾羌南境諸山一統志在葉爾羌西北

謹案今英吉沙爾諸圖志皆不載杭阿喇特嶺而廳西南有罕阿拉特木罕阿拉特卽杭阿喇特其水蓋以山得名其嶺當卽今烏魯克諸山古今稱名異耳

曰黑子爾山黑子爾泉出焉東北流一百三十里伏於戈壁

英吉沙爾廳圖說此山東南界莎車西北距城二百一十餘里
曰阿伊普山

英吉沙爾廳圖說此山崛起戈壁之中西北距城一百二十里
東南界莎車東北界疏勒

以上英吉沙爾境內支山

曰哈喇庫里山有水焉南流入於托布倫河

蒲犁鄉土志在城東一百里

謹案此嶺在齊齊克里克東南蒲犁廳東北哈喇庫里湖白
西庫湖艾南湖皆在其左右奇恰克驛經其北南卽托布倫
河也

曰鐵里牙山湯吉塔爾河水出焉南流入於托布倫河

蒲犁鄉土志在城東二百三十里

謹案此嶺在哈喇庫里東北嶺北卽英吉沙爾廳界嶺南有
往莎車驛路卽七里拱拜托魯布倫等驛也

曰色克里克山

蒲犁鄉土志在城東北四百七十里

謹案此嶺東南爲色克里克嶺下爲往莎車要道

曰哈孜山

蒲犁鄉土志在城東四百五十里

謹案哈孜或作黑子東距色克里克二十里爲赴莎車驛路
湯吉塔爾上游支河經此山麓

曰哈拉山

蒲犁鄉土志在城東四百四十里

謹案此嶺在哈孜之南十里開子驛經其下右諸山俱在托
布倫河之北

曰喀楚特山喀楚特水出焉

謹案此山在蒲犁城正南明鐵蓋嶺北出之支山西域水道
記云澤普勒善河西源出喀楚特山東北流二百餘里有齊

齊克里克嶺水南流百二十里經塞勒庫勒莊東來會塞勒庫勒在葉爾羌城西南八百里案塞勒庫勒卽今之蒲犁

曰阿布朗山有水焉北流入於賽里河

謹案此山或作烏帕朗在爾勒格蘇東南

曰爾勒格蘇山有水焉西北流入於賽里河

謹案此山在蒲犁城南勘界公牘云蒲犁城南一百九十里之和家克巴依卡柴草均足係塔墩巴什紅孜納普爾勒格蘇三道總要之地宜加兵扼守以重邊圉案爾勒格蘇北距和家克巴依卡六十里蓋距廳城二百五十里也

曰堪達山

謹案此山一作坎達爾達坂在牙滿西南蒲犁城東南由烏溪莊至枚爾羊莊經此山烏溪莊在廳城東一百五十里枚爾羊莊在廳城東南二百二十里以上三山皆紅孜納普嶺北出支山

曰牙滿山托布倫河經其北

蒲犁鄉土志在城東二百三十里

謹案此嶺一作押慢塔斯達坂在托布倫河之北不當孔道嶺西八十里爲烏溪莊嶺東七十里爲阿密里克莊

以上蒲犁境內支山

又東南曰卡拉胡魯木之嶺有水焉北流入於澤普勒善河

皮山鄉土志此山北距皮山縣城一千二百里西北通葉城東通伯凌吉達坂昌吉利達坂又東迤邐至於和闐北至合達孜阿卡孜素蓋提三達坂由阿卡孜西出葉城之八札塔拉由素蓋提北連克里陽雅爾提達坂出和闐境

謹案此山洪圖作喀喇闊魯木又名哈拉合拉木勘界公牘云由素蓋提向南行進山口八十里過達坂五十里至奇博里柴草均缺又六十里至明立克卡七十里至達爾烏孜與康挖克道會又五十里至黑子里塔哈轉向西南行四十里

至八浪沙卽洪圖之布朗薩沿途柴草全無又行五十里至
卡拉胡魯木達坂通退擺特^{即特}西南流之水卽澤普勒善河
源也詢有鐵鑄界碑埋藏此地距界碑約三里許有石砌三
角墩每方七尺高三尺樹石碑於墩上書皆洋文案據李源
鈞圖素蓋堤至卡拉胡魯木嶺三百五十里

其支山曰協坦耿山

莎車府圖說在城西南一百六十里與蒲犁界當驛道南

曰海立雅山

莎車府圖說在城西南三百餘里山高三千三十四生的米達

一生的米達合
中尺三分零

澤普勒善河經其北麓下有渡船

曰鐵格山其北麓泉水出焉北流入於澤普勒善河

莎車府圖說在海立雅山南東界葉城西界蒲犁高三千六百
二十五生的米達其泉北流會喇斯庫木水入於澤普勒善河

以上莎車境內支山

曰密爾岱山奇盤之水出焉是生玉石多犂牛捨狽狐

西域圖志密爾岱塔克舊音闐爾在葉爾羌西南

原作東

由是東

行接和闐南境諸山俱產玉

一統志在葉爾羌南產玉石

新疆圖說在葉城西南三百四十里奇盤水亦名達燕水發源
此山東流一百里至奇盤莊折而北流五十里至一西泥而入
葉城境又流六十里至慶木郝與澤普勒善河會

西域水道記密爾岱舊作闐勒自葉爾羌城南七十里至坡斯
恰木又西南五十里至汗亮格爾又東南百五十里至英額莊
又西南三十里至齊盤山又西南五十里至阿子汗薩爾又西
南六十里至密爾岱山峻三十里許四時積雪谷深六十餘里
山三成下成者麓上成者巔皆石也中一成則瓊瑤函之彌望
無際故曰玉山探者乘犂牛至其巔盤之墜而後取往往重千
萬觔山與瑪爾胡魯克山峯巒相屬玉色黝而質堅聲清越以

長乾隆二十七年八月葉爾羌辦事採進玉特磬料十一片重千四百三十觔姑洗磬二林鐘磬三南呂磬三蕤賓磬夷則磬仲呂磬各一十月進玉特磬料十四片重千五百九十觔太簇磬五夷則磬一大呂磬二夾鐘磬二仲呂磬二林鐘磬一是歲又進玉特磬料十四片重九百五十五觔蕤賓磬三夷則磬二林鐘磬一南呂磬五應鐘磬三

重華宮半度玉特磬料十片重八十觔太簇磬姑洗磬蕤賓磬夷則磬無射磬大呂磬仲呂磬林鐘磬南呂磬應鐘磬各一備用半度磬三片重二十九觔六兩二十八分三月採進正項磬料十八片備用磬料二十六片六月復進正項特磬料十一片黃鐘磬二太簇磬二大呂磬三夾鐘磬五備用特磬十一片黃鐘磬六太簇磬二姑洗磬二大呂磬一皆採自密爾岱山以準格爾鋸截之四十九年葉爾羌辦事差主事協同內庭司庫恭陳委領催七十三玉匠永福潤安詣山採正用玉冊五百片玉

寶五十方備用玉冊三百片玉寶三十方凡重四千七百五十
二觔五十五年內廷樂房災火樂器葉爾羌辦事探進罄料正
玉六十四塊副玉八塊其瑪爾瑚魯克山所產有質黑暈若血
沁然回民自裕勒阿里克卡倫來城鬻之因名其玉曰裕勒阿
里克高斌傳曰斌孫樸奏言乾隆四十一年往葉爾羌辦事距
葉爾羌城四百餘里有密爾岱山產玉久經封禁四十三年二
月高樸奏言回民往往私探防範維艱莫若以官爲開採間年
一次可杜攘竊營私之弊如所請行九月阿齊木伯克色提巴
勒底以高樸勒派回民三千餘探玉焚索金寶並串商盜賣首
之烏什辦事永貴遂革高樸職鞫實論斬如律自是設密爾岱
卡倫禁探玉嘉慶四年弛禁廢卡倫凡葉爾羌和闐產玉常貢
外聽民販鬻

嘉慶四年奉 上諭葉爾羌和闐等處出產玉石向由該民開採以充需用前經明文因高樸等疏商
販探買玉石案內始行定例凡私赴新舊舊產玉石者即照竊盜例計贓論罪原非舊例所有况仍
有餘將貨賣者今查案內因凡抽累多人發心疎虞不忍著照 其年有探進密爾岱山玉三首
刑部議滿後收買新舊玉石無論已未成器悉照舊例辦理欽此

者青重萬觔次者葱白重八千觔小者白重三千餘觔輦至喀

喇沙爾以其勞人罷之余經烏沙克塔勒在喀喇沙爾城東北二百二十里土

人導余至驛舍東北觀之半沒塵壤出地者高二尺許英屬齊齊哈爾山北

東北流百數十里還和什喇喇布在北國沿和什雙城之隔喇喇布泊爾西河水在焉爾光城西約二百六十里是謂探玉第六營在兩岸又東北流四十里經喀爾喀南是為第五營又東北流六十里還庫爾喀斯在兩河有密爾估泉水自南來

會是為第四營二營在北岸又東北流五十里還喀爾喀南是為第三營又東北流三十里還烏魯克明在北是為第二營又東北流三十里還烏魯克明在北是為第一營三營在兩岸又東北流七十里還庫爾喀斯南河水弱於沙河見底協辦

李主事一人率帖式侍衛各二人隨河干終以少卒乘船克以圖夫五百人來會十夫一運巴什河之缺費於岸役夫校更近流以探比嘉伯克教所傳玉於喇喇布其體重在一兩下者不入數三日一移費僅合二條帖式產四品商伯克一八六

品伯克四人同夫二百人入喀喇山各採玉乃皆喇喇布伯克妻夫役之勞者還喇玉於喇喇布城和國玉至喇喇布又每年新喇喇布玉一萬八千五六百兩至乾隆二十四年高

樸疏言葉爾羌大河來自產磬片之闕勒山順流而下至揚瓦

里克為洗伯過渡之所渡口上流三十里即探玉之處案葉爾

羌河向不產玉自平定回疆以後漸生玉石經前任大臣奏明

採揀然每年可貢者不過數十塊質尚遜於和闐續經前任大

臣採獲白玉三塊於乾隆四十年十二月致祭河神近年得玉

頗有似和闐者

謹案洪亮吉昆侖山釋據酒泉太守馬岌酒泉南山即昆侖

之體之語謂昆侖之首在西域而其體則綿亘南山以下均

謂之昆侖昆侖爲產玉之山今南山自葉城至於闐皆產玉而密爾岱爲最大半嶺以上純玉無石故世又呼爲玉山水經注云莎車有鐵山出青玉李光庭漢西域圖考亦謂莎車國今之葉爾羌有鐵山出青玉皆指今之葉爾羌西南之密爾岱山而言密爾岱舊作闐勒山亦作闐爾山急讀之則皮山也攷西山經黃帝取峯

謂如密爾岱天子傳注文
通李善注引此處作密

山之玉榮而投之

鍾山之陽瑾瑜之玉爲良堅栗精密潤澤而有光槐江之山其上多琅玕金玉長留之山多文玉石章莪之山多瑤碧符惕之山多金玉醜山多玉而無石泐山其上多嬰短之玉其陽多瑾瑜之玉翼望之山多金玉揆厥地望當在今莎車和闐之間疑所謂密爾岱于闐南山者皆是而峯密同聲泐山因泐澤得名尤爲確鑿可信故古來言昆侖者兼屬之南山也

南流

南流雲云塔里木河發源於崑崙山南麓中處玉石甚多大有如掌如斗小者如拳如卵各色不潤其如
密之白雲之青蘭之黃丹之赤黑之黑者爲上品一類羊脂米珠一類粉如波斯金片均屬者尤爲上品土

人亦不七焉蓋和闐河上下均出玉其流
至庫布泊山麓所屬其間蓋得是也

往者康熙時遣人探河源入衛藏始定

岡底斯山爲昆侖不問其玉不玉也平定張穆亦謂山經產玉之山處處有之昆侖不必產玉產玉不必昆侖又斥火炎昆岡玉石俱焚爲僞書以爲爾雅中下二篇多後人增益於是主葱嶺南山者一變而爲岡底斯山矣漢武按古圖書指河所出爲昆侖且言多玉石蓋指南山而言楚辭涉江曰登昆侖兮餐玉英是又漢以前以南山爲昆侖之一證也又何疑於爾雅允征乎

曰裕勒阿里克山

謹案回語裕勒淨貌謂渠爲阿里克山下有清水渠故名裕勒阿里克卡倫在其下東北距葉城縣二百九十里玉拉里克水蓋以此山得名玉拉里克卽裕勒阿里克也

曰英額齊盤山其上多玉

西域圖志在葉爾羌西南英額齊盤西十里與裕勒阿里克塔克東西相望俱在葉爾羌謬斯騰境內其南境爲裕勒阿里克

塔克

葉城鄉土志在縣城西南二百八十里山上平坦寬曠周百餘里產玉鮮有佳品邇於和闐居民間有採取者

曰阿格里山有水焉北流入於澤普勒善河

謹案此山東北距葉城九百七十里勘界公牘云由星硤阿格嘴向東北行百二十里至和勒格蘇柴水足草無一百二十里過阿格里達坂柴水草俱有與蘇合外提路會蓋星硤嶺迤東北出之支山也

曰英艾山聽雜布河東源出其北

謹案勘界公牘云由葉城縣向西南歷庫庫卡越英艾達坂蓋可卡提嶺分支西行者也

曰瑪爾胡魯克山庫庫雅水出焉北流入於聽雜布河

新疆圖說在葉城西南三百里

謹案此山在英艾山西北

曰八札塔拉山有水焉西北流入於澤普勒善河

謹案此山在葉城西南阿格里山東北距英艾一百二十里
爲星硤嶺迤東北出之支山通喬堡

曰爾帶克沙的山有水焉西北流入於澤普勒善河

謹案此山東南距八札塔拉四十里東北距英艾八十里爲
通怕合浦之道

曰庫克雅爾山

西域圖志在裕勒阿里克東南聽雜布謬斯騰發源山中

謹案庫克雅爾卽庫庫雅爾回語庫克青色雅爾坎也山色
青下臨坎故名在英艾山北故所出之水皆聽雜布河源也

曰伯什鐸列克山庫庫雅水東北流二百四十里經其北麓

謹案此山在葉城縣南六七十里庫克雅爾山之北

以上葉城境內支山

曰貝拉山

西域圖志在庫克雅爾東北

一統志在葉爾羌東南

謹案皮山鄉土志縣城西南一百八十里有波內莊洪圖許圖作博喇蓋卽貝拉之轉音其地正當庫克雅爾東北

曰奇勒揚山

西域圖志在貝拉南庫克雅爾東庫克雅爾奇勒揚兩塔克以南爲痕都斯坦界

一統志在葉爾羌東南其南爲痕都斯坦界

謹案洪圖桑株山西庫庫雅山東南有吉利羊山卽此奇勒揚也山在黃綫界內故志云南爲痕都斯坦界今圖志均不載此山蓋古今異名耳

曰和什山葉什勒之水出其東麓

西域圖志在奇勒揚東北

一統志在葉爾羌東南

謹案皮山鄉土志縣城南九十里爲合什塔莊蓋因山得名
洪圖作呼什塔克新疆圖說正作和什塔克

曰桑株山桑株水出其北麓厥產黑土其樹多梨小而味甘

皮山鄉土志在縣城南其山雪水會入草湖北出一百二十里
開卡孜渠又四十里開白孜渠至木吉又五十里開沙布爾渠
又二十里開賽衣提拉渠又三十里開仁爾巴哈渠其注蔭一
十二莊

勘界公牘由邱邱達坂西南行七十里至垣卡春冬水小由桑
株百餘里順河而上夏秋則當繞邱邱達坂山垣卡轉向東南
行六十里至渠滾四圍山皆青草有布魯特人十餘戶居此牧
放向西南行五十里至桑株達坂丁癸騎崙辛乙過徑山峰極
陡峭居然天險有一夫當關萬人莫敵之勢東流轉向北流之
水繞桑株莊出木吉伏戈壁山生黑土用火炒之可代顏料

謹案西域圖志薩納珠塔克在薩納珠東南自英額齊盤至

此東西懸互爲葉爾羌南境諸山皆由葱嶺分支東南行六百餘里接和闐南境諸山一統志云薩納珠山在葉爾羌東南山脈自英領齊盤至此皆葱嶺之支峯薩納珠卽桑株蓋音變字也據皮山驛站計程由縣城東南行九十里至木吉又南行九十里至桑株莊一名哈拉又南行五十里至克伯孜又南行六十里至阿卡孜又南行三十里至桑株達坂又西南行一百三十里過達坂抵塔烏孜卡總計距縣城三百二十里過嶺四百五十里鄉土志謂六百餘里誤也

曰克里陽山產白土

皮山鄉土志在縣城南又名居什肯其山雪水會入草湖北出一百五十里開沙狀渠又八十里開克里陽渠又三十里開玉拉格渠凡注蔭一十九莊山生白土用火炒之粉牆極白

謹案由皮山縣南行九十里抵合什塔又南行三十里抵司馬晒又南行二十里抵克里陽卡又南行八十里抵阿克受

又南行五十里抵拉木籠又南行五十里抵居什肯卽克里陽達坂東西高山中有草湖又東南繞西上達坂越達坂南行下達坂約計百里抵土古滿據此則由縣城至克里陽山祇三百二十里南出山亦祇四百餘里鄉土志作距城五百餘里誤

曰八沙拉嶺玉拉里克水出其北麓北流匯於庫庫雅之河

勘界公牘由葉城縣東南一百六十里至克里陽卡再南行九十里至阿克壽草盛薪缺有敖罕種民數戶居此尙有七十餘戶在各山溝牧放又東南行九十里至拉木籠薪足草無多又南行百里至渠坤左右兩山上下二三十里皆青色有野葱又轉西南行六十里至八沙拉達坂壬丙騎崙甲庚過境山極峻峭儼入雲天時寒時熱乍雨乍晴積雪盛夏不消瘴霧時作每年自六月起九月止人馬可行餘月皆爲雪阻山梁尙平坦曰素蓋提山有蛇焉一角而虎爪可以避邪

皮山鄉土志在縣城南七百里

勘界公牘由葉城縣向東南歷桑株達坂至素蓋提卡洪圖作蘇哲特計程六百五十餘里又向南行進山口八十里過達坂五十里至奇博里卽洪圖之池布喇也

謹案八沙拉桑株各嶺重巒疊嶂形勢危險皆由素蓋提東山出脈直行西北則可卡提英艾爾帶克沙八札塔拉嶺爲莎車葉城南障由可卡提嶺分枝迤北而東則八沙拉接連桑株爲葉城外東南障皆屬南山之枝節阿巴伯克里爲兩嶺總徑截要迤東則賽圖拉迤南爲哈里渠坤柴草茂盛可屯千軍踰可卡提嶺出山口卽澤普勒善河計程約二百里由山口順河直趨八札塔拉卡可扼坎巨提由星硤紅孜納普各嶺入葉城各道而不能兼顧條拜提由卡拉胡魯木來路惟在可卡提山口駐兵扼守不獨與素蓋提賽圖拉聲氣聯絡卽與八札塔拉卡亦一氣貫注其中數百里可資軍用

而素蓋提卡亦爲要隘其南逾嶺直趨卡拉胡魯木東四百一十里達阿吉闌干有通和闌之道迤東諸山爲呢蟒依山係和闌南障接連普下大山又屬和闌西障也

曰可卡提山

勘界公牘由八沙拉達坂東南行二百三十里至阿巴伯克與桑株道會向南行一十二里至托古爾蘇由英艾達坂以東諸山之水出此向東南行三十里至賽圖拉洪圖作沙音都拉又名叶的拉未經平定之先商賈往來多被坎巨提人劫掠土著布回亦受其害英人於沙灘中就我舊堡加修周圍二十二丈有奇南北方寬五丈東西方寬六丈有奇堡身高九尺厚約四尺垛口高三尺厚約七寸房屋十一間馬棚二區向東南進山口爲哈里渠坤柴草蕃茂能供數營之需百餘里踰可卡提達坂出山口沙梁橫互有石砌舊房基十數墩臺一座若仍設兵防守與素蓋提一帶防兵聲勢聯絡可扼條拜提由卡拉胡魯

木昌器利滿兩道矣

謹案賽圖拉英人所築卡房係英使楊哈斯班遊歷至此偃回人士的修等修葺我舊堡給以火藥以保護往來商賈實則華疆也今已杳無人迹矣

曰阿卡孜山

謹案皮山鄉土志一名阿哈塔黑洪圖作阿克塔克據驛站計程由皮山縣城至阿哈塔黑八百七十里北距素蓋提山一百八十里

曰合達孜山

謹案皮山鄉土志一作特哇孜色立克勘界公牘云由素蓋提達坂南行二百三十里至黑子里塔哈轉向西南行九十

里至卡拉胡魯木達坂黑子里塔哈卽合達孜也

據鄉土志特哇孜色立克北距明立克下

三十里據皮山驛站計程由縣城南出克里陽山四百二十里又二百九十里出素蓋提山又三百二十五里抵特哇孜色立

克共一千三十餘里

曰普下山哈喇哈什河經其西北

皮山鄉土志在縣城東南七百八十里此處係大山窩有居民
十數戶不通車馬罕見人迹

曰雅爾提山

皮山鄉土志一名蘇皮哈拉哈爾距縣城東南五百餘里其山
雪水會入草湖北出二百五十里注杜哇莊又一百二十里注
帕爾慢莊

謹案雅爾提一作牙玉特

曰陽阿里克山

新疆圖說在葉城東南四百七十二里

謹案此山在普下山西北杜哇山西南

曰杜哇山有泉出焉

皮山鄉土志在縣城東南二百餘里厥產紅土

謹案由帕爾慢驛南行六十里抵杜哇莊莊在山東雅爾提
山雪水注之山生紅土用火炒之可作顏料

曰帕爾慢山

皮山鄉土志距縣城東南二百餘里

謹案皮山城東二百四十里爲帕爾慢莊有帕爾慢驛在杜
哇水東通和闐

曰邱邱山

勘界公牘由葉城縣東南行一百里至波內莊卽洪圖博喇六
十里至克里陽卡轉向東行六十里至和什拉莊卽洪圖呼什
塔克又一百里至桑株莊仍向東行六十里至黑子爾校闌干
樹多草少向西南行七十里至麻札薪足草缺又四十里至邱
邱土達坂四山草極蕃茂

以上皮山境內支山

又東南曰昌器利滿之嶺有水焉東流伏於戈壁

李源鈞勘界圖由葉城縣東南行歷桑株達坂至素蓋提計程六百五十餘里折而正東行至阿吉闌干計程四百一十里由此轉西南折正南至昌器利滿達坂計程五百七十里

謹案此嶺與條拜提接壤條商向由卡拉胡魯木往來嗣因坎部擾亂改道由此嶺直入于和承平後仍歸故道勘界公牘云由阿吉闌干有三大石倚石砌牆垣數處以東石山中之清水由此伏流至色勒格蘇與諸南山中北流黃泥水會皆哈拉哈什河源也正南上山坡路平坦過小土達坂據土人云向東北行有通于闐之道計八十里至布拉可巴什柴草均缺有數泉流入小冰海泉邊青草無多向西南行八十里至克子布拉可山麓皆紅土柴草均缺有數小海水碧色味鹹結又行百一十里平坦巖戈壁至塔勒塔得柴草均缺又行七十里平坦山路至克奇克庫里亦有數泉流十餘里伏於地泉邊青草難供一騎仍向西南四十里平坦山路轉

向正南六十里土戈壁一帶風甚烈有水處早晚皆結冰六月披裘儼如嚴冬瘴霧尤厲觸之頭腹皆痛疑爲崑岡絕頂也過小土達坂二十餘里仍土戈壁沿路柴草俱無昌器利滿達坂諸山中之水由此繞向東流從茲漸有高峯矣順山溝向東南行三十餘里轉正南折西南六十餘里至昌器利滿達坂通退擺特柴草全無用羅經測準子午騎崙卯西過徑比用木板鐫數語云查昌器利滿達坂卯西向水分東西流東流屬中西流屬外騎崙分界中外分明誠天然界限也書此爲記離山梁路南約二十步埋藏石塊內此嶺及諸峯多積雪盛暑不消俄人康穆才甫游記云陟一高平地砂磧含鹹上有數湖卽鹹戈壁數小海也昌器利滿獨起高峯天然壁劃順山嶺迤西北則卡拉胡魯木達坂卽喀喇科隴皆屬新疆通條拜提第一層門戶也

又東曰札克安巴之嶺

謹案此嶺卽新疆識畧之察克瑪克曲底雪山在呢蟒依山

東南通後藏

又東北曰呢蟒依之山一曰哈朗歸南望痕都斯坦東望和闐和闐水出其陰北流注於塔里木河其中多玉

西域圖志哈朗歸塔克舊音哈朗圭在和闐西南境阜窪勒南又東南爲額什墨提斯塔克皆屬和闐南境之山亦自葱嶺分支過葉爾羌南境又東行至此和闐郭勒出其北麓

一統志呢蟒依山在和闐南東西有二山和闐河分出其麓

西域水道記和闐河有二源西源曰哈喇哈什河東源曰玉璫哈什河玉璫哈什亦有二源西源出哈朗歸東源出雪山二源會流至額克里雅爾與哈喇哈什會後魏書云于闐城東二十里有大水北流號樹枝水卽黃河也一名計式水城西五十五里上五字衍文後周書北史作十五里亦有大水名達利水與樹枝水會俱北流樹枝卽

東源達利爲西源河產玉諺曰玉河漢書西域傳言于闐多玉

梁書西南夷傳有于闐玉河是其名稱從來已久高居誨使于
闐記云于闐河分爲三東曰白玉河西曰綠玉河又西曰烏玉
河張匡鄴行程記云白玉河在城東三十里綠玉河在城西二
十里烏玉河在綠玉河西七里其源雖一而其玉隨地而變每
歲七八月水退乃可取謂之撈玉據斯言白者玉瓏綠者哈喇
烏者爲阜窪勒惟今之阜窪勒未聞出玉差爲異矣

之分流北行百餘
里而止不通他水

張家渠在哈喇烏河在和
闐西即哈喇烏河

和闐鄉土志呢蟒依山距州城五百八十里山勢險峻堅冰積
雪人迹罕到

謹案漢書西域傳云于闐在南山下南山者土人稱密克瑪

克曲底雪山在和闐額里齊城南五百八十里

額里齊在國語中與瑪城
之切也與音作伊立瑪

漢書言南山者以別葱嶺文獻通考言于闐都葱嶺之北二
百餘里以葱嶺爲南山誤矣南山水經注謂之仇摩置有二
谷曰桑谷曰樹雅二谷出水分流回人統呼爲桑谷樹雅金

玉皆產其中東南遙達西藏東則綿延數千里直抵青海之庫爾坤山東麓爲巴延哈喇達巴罕北卽星宿海漢書河有二源一出于闐南山下卽其地也魏書西域傳蒲山國西南三里有凍凌山唐西域記王城西南二十餘里有瞿室餒伽山山峯兩起巖隙四絕西域圖志云魏時蒲山國爲今皮什南皮雅勒阿勒瑪等處所謂凍凌山者當在其西南境西域記載瞿室餒伽山在王城西南二十餘里今和闐額里齊城西一百六十里地名皮什南城居山谷皮什南與瞿室餒伽字音相近方位亦符兩峯四絕之形勢猶有存者是瞿室餒伽山當在今皮什南之南爲堅珠哈朗歸額什墨提斯諸塔克也案南山峰嶺相屬古今異稱自回人改譯土語而山名益不能確指其定在要之皆爲于闐南山也哈朗歸回語黑暗也呢蟒依回語雪也距和闐州城五百八十里新疆圖說云呢蟒依山在城南六十里蓋和闐人謂城南之山俱謂之

呢蟒依也其山舊有小徑可通衛藏提督董福祥勦竄賊白
彥虎毀之光緒丙午夏英人司德訥言昔我國人踰此山至
於印度必有舊徑吾將往跡焉抵哈朗歸遇急湍不可進後
易皮筏浮而下陟呢蟒依雪山未半瘴甚從者皆嘔血遂返
然度嶺之志益決考唐吐蕃入西域東則取道於甘涼西則
假途於勃律大勃律卽今之巴勒提在博洛爾回部其界連
于闐南山雪山之險數倍於木素爾嶺小勃律則踰葱嶺而
西爲漢烏秣南境其道迂而夷故吐蕃多由之李光庭漢西
域圖考云今克勒底雅城有路通後藏之招正注云路在正
南克勒底雅卽今之克里雅其地正當和闐于闐之南雪山
之麓彼英人之所指殆卽克里雅一途爲董提督所毀者然
雪深瘴毒狼獸愁攀矧復破墊益難側足故兩進而兩卻也

其支山曰堅珠山

西域圖志在和闐西南境皂窪勒西南卡薩納珠

四里

二百里

謹案皂窪勒爲和闐屬境在城西北一百二十里由是西行
踰黃水溝至葉爾羌界

曰瑪雜爾山

西域圖志在和闐郭勒西三百里爲和闐北屏山不甚高產火
硝不當孔道魏書西域傳于闐地方互千里連山相次按自瑪
爾占譯勒氏西行至瑪雜爾塔克迤邐而西連山不斷直抵葉
爾羌譯斯騰當屬于闐北界魏書所謂連山相次者以此

謹案此山在和闐城北不與南山相屬

曰阿拉克山哈喇哈什之水出焉

謹案此山在和闐州西南昌器利滿嶺西北其水北流爲哈
喇哈什河山皆冰雪北有小徑

曰庫布哈山

謹案此山在和闐州西南阿拉克東北其水亦哈喇哈什河
源

曰牙拉阿山

謹案此山在和闐州西南庫布哈西北其水亦哈喇哈什河源

曰乙品山

謹案此山在和闐州西南牙拉阿東北

曰默特司山有水焉北流入於哈喇哈什河

謹案此山在和闐州西南乙品山東其所出之水蓋亦哈喇哈什河源也一統志額什墨提山在和闐南卽此山

曰多拉山默特司之水逕其西

謹案此山在和闐州西南默特司東北

曰烏普阿山

謹案此山在和闐州西南多拉山西北

曰玉司馬山尼沙水經其西

謹案此山在和闐州南烏普阿山東南尼沙水出呢蟒依山

入於玉璫哈什河

曰布倫哈山切取水經其西

謹案此山在和闐州南玉司馬山北切取水出呢蟒依山東北流入於玉璫哈什河

曰卡浪古山

謹案此山在和闐州南玉司馬山東和闐鄉土志卡浪古明在城南二百二十五里南抵呢蟒依山其明蓋卽以山命名纏回謂千曰明猶言千戶也山南有蘇明介乙哈拉及威衣波衣拉克兩大牧場

曰忙普倫山玉璫哈什河經其北

謹案此山在和闐州南卡浪古山北一名樂春山

曰皮素絲山

謹案此山在和闐州南忙普倫山北

曰烏魯山

謹案此山在和闐州東南皮素絲山東爲和闐洛浦東西界山

曰乙梗山有水焉西北流入於玉璫哈什河

謹案此山在和闐州東南與于闐縣塔枚梗莊界

以上和闐境內支山

曰鐵蓋列克山阿拉隆伊拉克及覺可伊拉克二水出焉西流入於玉璫哈什河

謹案一作帖克里克山在洛浦縣城東南七十里于闐縣城西南四百餘里兩縣交界之山山脈由南山附玉河而來石骨嶙峋上無樹木山下有小泉二道北流一至闐干地一至白石驛山之西北一帶有沙灘名大胡麻地大胡麻地北距洛浦縣城九十里小胡麻地在縣城北三十里中產子玉爲最上之品

以上洛浦境內支山

又東曰克里雅之山克里雅水出焉多金多鹽鹽鹹成塊不待煮
煉土人任便取食多犂

釀土人任便取食

多筆

牛多捨獐獐多野牛野馬

于闐鄉土志在縣城極南千餘里與後藏交界

西域水道記克勒底雅山有徑通藏地康熙五十八年六月四

川總督年薨堯疏言近者西藏諸部落以貝勒達顏病故

東街舊汗
日麻巴汗

噶爾丹丹洞莊傳有和碩特之羅賓汗滅之留主其地遂無和碩賓汗長子嗣其汗

人人有相吞併意閭策零敦多布現今左

哨頭目春不勒率兵六百餘過喀喇烏蘇河往青海又聞發兵

八千來藏已至葉爾羌克勒底雅雍正元年六月青海羅布藏

丹津

顯汗之孫達什巴圖爾之子烈和碩襲王以叛削爵

將由克勒底雅入藏松潘鎮總兵官周瑛

選精騎三百勒康濟船

西番功作康巴結索特納木佳勒澤漢字性純善體
廣廣能初其阿星喝爾本封貝子後辦噶卜倫中

帶番兵萬餘

由楊八景追至噶勒藏骨岔限雪乃止西藏志曰自衛藏招正

北行二十四日至納克產又十五日至書隆沙爾又十八日至

克勒底雅城是也

西藏志又云自阿里西北至噶之邊都克城十五日多遙城
先是有兩路可達交戰處雖在屬正北氣漸寒在屬西北也

克勒底雅山

千餘里淤沙積雪煙瘴逼人冬夏不可行水發山中北流經克

勒底雅城東

謹案準部由回疆擾藏叛會由青海竄藏皆嘗取道於此卽唐吐蕃入西域之路也克里雅者回語來而未定之辭山之西南有伊爾里克淖爾水自淖爾溢出是爲克里雅河初源東北流流水山之水自東南來入之流水山在手關縣東南產硝子石水出山中後與曲西西北流入大河又北流普羅山之水自西南來入之普羅山即舊律之轉音蓋古大勃律之界也在手關縣正南有二水一出正南山中曰帖拉克一出爲西南山中曰庫卜拉克流出奔關山東北流與大河合又東北流經博瓦子蘭干莊分爲東西二渠渠在河又東流分一渠渠在河又東北流分二枝東西分流環抱阿雅莊行二十餘里仍合流經于闐縣城東唐書云于闐東三百里有雄略力河河東有雄略力城亦曰拘彌城即舊彌放城雄略力河即此河也今河在城東城郭遷移不足異也又北流阿羌山之水自東南來入之阿羌山水出于闐城東南城郭遷移不足異也又北流皮介山水合哈喇布拉克水闐木牙水自折而西北入大河又北流皮介山水合哈喇布拉克水自東南來會水出哈喇布拉克山西北流入皮介山水又東來入之皮介山水出皮介山北流哈喇布拉克水自東南來會水出哈喇布拉克山西北流入皮介山水又北流闐木牙水自東南來會水出闐木牙山北流分爲二枝一北流注乙斯不洛圖一西流入皮介山水三水合流經皮介拉克莊折而西經自新莊又西入大河又北流入沙磧此河自發源至于闐縣城約一千二百餘里夏漲冬涸灌溉之利實攸賴焉又北流約千

里始入沙磧沿河有草土人資以畜牧再北則彌望沙漠寸草不生考唐辨機西域志謂之婁摩川東入沙磧新疆識略水道表亦列爲伏流是此水並不入大河西域水道記以此河注葱嶺大河入羅布淖爾殆未經親歷耳

其支山曰喀喇塔什山喀喇塔什之水出其北麓產金

于闐鄉土志喀喇塔什在縣城西四百五十里鐵蓋列克山東謹案水出山中北流經阿希闐干爲阿希河又北流經策勒村爲策勒河又北流入沙磧

曰卡依拉乞莽山沁美勒克河水出焉

于闐鄉土志在縣城南五百餘里喀喇塔什山南

謹案此山在于闐縣境努勒村南沁美勒克河出山北北流經安壩莊曰安壩河安壩莊距雪山近水草饒足居民且耕且牧又北流經恰恰莊曰恰恰河又北流經固拉哈馬爲固拉哈馬河

在縣城西一百九十里

又北流分渠之後入沙磧

曰阿克恰克勒山潘拉克水出焉

于闐鄉土志在縣城南六百八十里卡依拉乞莽山東

謹案此山在縣境南水源出其北北流經烏魯沙依莊東爲烏魯沙依水又北流分渠之後至潘拉克入沙磧約六百里

曰努拉山

于闐鄉土志在縣城南六百餘里阿克恰克勒山東

謹案此山在于闐縣境南水源出山北經努拉莊北流會沙依巴克水分渠溉田

曰沙依巴克山沙依巴克水出焉

于闐鄉土志在縣城南五百餘里努拉山東

謹案此山在于闐縣南水源出其北北流至達木溝分渠之後入沙磧

曰細黑喇山罕蘭溝水出焉

于闐鄉土志在縣城南四百餘里沙依巴克山北

謹案此山在于闐縣境南水源出山北北流分二支一西北流入達木溝一東北流爲罕蘭溝水初源分渠之後北流入沙磧

曰吉比塔哈山

于闐鄉土志在縣城南三百餘里細黑拉山迤南

曰科可布拉克山

于闐鄉土志在縣城南三百餘里吉比塔哈山東

曰普羅山

于闐鄉土志在縣城南二百六十里科可布拉克山東北

謹案普羅或作泡洛卽勃律之轉音蓋古大勃律之界在縣境正南有二水一出正南山中曰帖拉克一出迤西南山中曰庫卜拉合流出普羅山東北流與克里雅河合

曰科可牙山

于闐鄉土志在縣城極南七百餘里普羅山南

謹案科可牙或作克雅得牙右十山爲克里雅迤西諸山俱在塔克努明境內

曰流水山有水焉產礫子玉

于闐鄉土志在縣城南二百五十餘里普羅山東

謹案此山在于闐縣境南水出山中淺狹曲折西北流入克里雅河

曰索胡塔雅克山

于闐鄉土志在縣城南二百八十餘里流水山迤東

謹案索胡塔雅克洪圖作索克托雅

曰阿羌山阿羌水出焉

于闐鄉土志阿羌一作阿仙山在縣城南三百二十里索胡塔雅克迤東

謹案阿羌洪圖作阿禪阿羌水出阿羌山中北流經于闐縣東喀喇庫木什莊折而西北入克里雅河

曰皮介山有水焉北流入於克里雅河

于闐鄉土志在縣城南三百五十里阿羌山迤東

謹案皮介山或作必佳山有水北流會喀喇布拉克及圖木牙兩山之水自新莊入於克里雅河

曰喀喇布拉克山有水焉入於皮介之河

于闐鄉土志在縣城南三百八十里皮介山迤東

曰圖木牙山有水焉西北流入於皮介之河

于闐鄉土志在縣城南四百一十里喀喇布拉克山迤東或作吐木牙

曰瑪勒袞山

于闐鄉土志在縣城南四百五十里圖木牙山迤東

曰三姜山

于闐鄉土志在縣城南四百七十里瑪勒袞山迤東北

曰瑪特山

于闐鄉土志在縣城南四百八十里三姜山迤東

曰庫烏瓦山

于闐鄉土志在縣城南四百九十里瑪特山迤東

曰恰哈提山

于闐鄉土志在縣城東南五百餘里庫烏瓦山迤東

謹案此山或作洽哈底山北有水東北流入於烏魯克沙依之河

曰俠馬山烏魯克沙依之水出焉

于闐鄉土志在縣城東南五百二十里恰哈提山迤東

謹案俠馬或作下馬勒山在縣境東南水源出山北曰烏魯克沙依河北流至尼雅爲尼雅河分渠之後入沙磧

曰蘇拉瓦克山

于闐鄉土志在縣城東南三百二十餘里俠馬山迤北

謹案或作梭羅瓦克洪圖作索爾曼克卽大金廠在于闐縣

境東譯言當風揚沙也蓋以土人挖金當風揚沙得名

曰達爾千里克山

于闐鄉土志在縣城東南五百七十餘里俠馬山迤東或作他拉竿

曰奇吉罕山

于闐鄉土志在縣城東南六百一十里達爾千里克山迤北

曰乙依克山

于闐鄉土志在縣城南六百五十里奇吉罕山迤東

曰格支布拉克山

于闐鄉土志在縣城東南六百八十里乙衣克迤東

曰玉洛袞布拉克山

于闐鄉土志在縣城東南七百里格支布拉克山迤東南

曰英吉介山哈爾哈什水經其東

于闐鄉土志在縣城東南七百一十五里玉洛袞布拉克迤東

或作英豈介

曰圖朗和加山哈爾哈什水經其西

于闐鄉土志在縣城東南七百七十里英吉介山迤東一作托
蘭烏佳

曰喀喇沙衣山喀喇沙衣之水出焉東北流入於安得月河

于闐鄉土志在縣城東南八百五十里圖朗和加山迤東

謹案水出山北北流至安得月入沙磧

曰三加山有水焉東北流入於安得月河

于闐鄉土志在縣城東南八百七十里喀喇沙衣山迤東

謹案水出于子塔哈西南山中北流又折而東北入安得月

河

曰于子塔哈山安得月水出焉

于闐鄉土志在縣城東南九百里三加山東南

謹案安得月河發源於于子塔哈山曰波斯坦托合拉克北

流入沙磧洪圖安得月作安得喇

曰克子里雅山克子里雅水出焉

于闐鄉土志在縣城東南九百五十里于子塔哈山東南

謹案此山在于子塔哈山東南水源出山西于子塔哈迤東

山中諸小水自南來會合流西入於安得月河

曰阿斯敦塔哈山有小水三焉出其北麓

于闐鄉土志在縣城東南九百餘里于子塔哈山迤北

謹案此山在于子塔哈山北其水曰克奇克色干曰穹色干

曰博和布拉克均發源於山北北流又折而西入於安得月

河

曰阿卜山阿卜水出焉

于闐鄉土志在縣城東南九百三十里阿斯敦塔哈山迤東

謹案或作阿拔坦山在阿斯敦塔哈之東阿卜水出其北北

流奇底里水自東北來會此水亦出阿卜北山之麓合流入

於安得月河

曰窩牙衣拉克山

于闐鄉土志在縣城東南九百八十里阿卜山迤東或作阿衣乙拉哈

曰布胡拉山

于闐鄉土志在縣城東南一千里窩牙衣拉克山迤東

曰昆洛克沙衣恰克勒山

于闐鄉土志在縣城東南一千五十餘里布胡拉迤東

曰奇底里克恰克勒山

于闐鄉土志在縣城東南一千一百餘里昆洛克沙衣恰克勒

山東南

曰枚勒卡恰克勒山

于闐鄉土志在縣城東南一千二百餘里奇底里克恰克勒山東北

曰卡巴山產金

于闐鄉土志在縣城東南一千二百餘里枚勒卡恰克勒山西
北卽小金廠

謹案洪圖作闊帕或作卡拔

曰麥衣提山麥衣提水出焉北流入於戈壁

于闐鄉土志在縣城東南一千二百八十里卡巴山迤東或作
密提

曰托和巴衣山

于闐鄉土志在縣城東南一千二百餘里麥衣提山東南

曰卡勒木南山

于闐鄉土志在縣城東南一千三百三十餘里托和巴衣山東
北或作哈拉敏

曰烏爾拉克羌山

于闐鄉土志在縣城東南一千三百五十餘里卡勒木南山迤

東或作阿祥

曰伊三千山

于闐鄉土志在縣城東南一千三百八十餘里烏爾拉克羌山
迤東或作一山干

曰阿克牙山

于闐鄉土志在縣城東南一千四百餘里伊三千山迤東

曰庫朗木拉克山

于闐鄉土志在縣城東南一千四百五十餘里阿克牙山迤東

曰跳提勒山

于闐鄉土志在縣城東南千五百二十里庫朗木拉克山迤東

曰覺可沙依山有水焉北流入於卡牆河

于闐鄉土志在縣城東南一千七百餘里跳提勒山東南

曰摩拉布拉克山有水焉北流入於卡牆河

于闐鄉土志在縣城東南一千九百餘里覺可沙衣山東南或

作毛拉布拉河

曰托固斯嶺

于闐鄉土志在縣城東南二千餘里摩拉布拉克山迤南

蒲案洪圖作托古茲此爲東南分支過脈大嶺

曰烏魯克蘇山烏魯克蘇水出焉是爲卡牆河之源

于闐鄉土志在縣城東南二千四百餘里托固斯達坂迤東

謹案卡牆河有三源一爲烏魯克蘇一爲阿格塔克一爲阿里雅拉克三水合流是爲卡牆河西流經摩拉布拉克山又北流折而東北經婁羌縣入於羅布淖爾水經注且末河卽此卡牆河蓋音轉字卡牆且末故地也石晉高居誨使于闐記云又西渡陷河是古時出陽關赴于闐必由鹽澤渡且末今由卡牆至羅布淖爾必渡此河以道路證之實且末河也西域水道記載羅布淖爾所受諸水不列此河

曰阿格山阿格塔克水出焉是生金

于闐鄉土志阿克塔克在縣城東南二千五百餘里烏魯克蘇山東南

謹案在于闐縣境東南纏回謂後爲阿格謂山爲塔克猶華言後山也其地產金積雪不消瘴癘亦甚採金者惟夏月可入水出山中西北流與烏魯克蘇合入阿里雅拉克河

曰阿里雅拉克山阿里雅拉克水出焉

于闐鄉土志在縣城極東二千六百餘里阿格塔克東與青海界

曰阿克蘇阿子山

于闐鄉土志在縣城東南二千四百餘里阿格塔克迤北

曰牙烏拉克山

于闐鄉土志在縣城東南二千四百六十餘里阿克蘇阿子山迤東

曰黑子龍溝山

于闐鄉土志在縣城東南二千五百有餘里牙烏拉克山迤東
謹案右四十九山俱在克里雅明境內爲克里雅迤東諸山
以上于闐境內支山

又東曰沙圖圖之嶺

一統志在和闐東境外自塔克邨踰葉什勒淖爾南東行沙磧
六百里至此山勢越北岡巒連屬不絕

西域水道記此嶺南北與哈喇沙爾城直中隔千四百餘里嶺
北趨四百餘里折而西北千二百餘里至布古斯孔郭爾郭之
南而止

圖志云此嶺在布古斯孔郭爾城東北五百里其地近百里其地有沙磧中有大山嶺沙磧與支山也

謹案回語圖圖梯也沙圖圖狀其層出

又東北曰額勒圖郭勒之嶺

一統志在和闐東境外沙圖圖嶺之東北四百餘里特起大山
支峯延亙沙磧中

又東北沙磧中有山曰碯什達爾烏蘭達布遜之山多紅鹽碯砂

一統志在和闐東境外額勒圖郭勒山之東北踰踞沙磧其東
遍連山不斷與安西州屬南山相望西域水道記碯什達爾烏
蘭達布遜山南北與羅布淖爾直中隔千里其山高峯崛起西
北行二百餘里分二支南支西行二百餘里爲順托郭爾山而
止北支西北行千四百餘里轉西至沙雅爾之南陞而止
謹案回語碯砂曰碯什達爾鹽曰達不遜山產碯砂紅鹽故
名明華夷譯語鹽曰答不遜卽達不遜也或作勒科爾烏蘭
達不遜

又東南曰錫津烏蘭之山

西域水道記此山南北與吐魯番城直中隔千四百餘里

又東北曰巴顏哈喇得里奔巴之山

西域水道記此山之西二百里分支西北行一千里至羅布淖
爾南八十里而止支山之東爲瑪海沙磧周二千餘里當哈喇
淖爾之西又東北爲噶順

蒙古噶順之
舊名其水險甚

沙磧又北爲伊爾瑚瑪沙

磧當哈密城西南蓋和闐東北大漠無垠辨機西域記云于闐東行入流沙沙磧流漫聚散隨流人行無跡遂多迷路四遠茫茫莫知所指行四百餘里至覩貨羅故國國久空曠城皆荒蕪從此東行六百餘里至折摩馱那故國卽沮末地也城郭歸然人烟斷絕從此東行千餘里至納縛波故國卽樓蘭是知沙磧計程二千里而遙漢渠勒精絕戎虛小宛諸國淹沒無蹤意淪入瀚海如曷勞落伽城之比矣

謹案西域水道記錫津烏蘭及巴顏哈喇得里奔巴山後有諾木齊圖山巴顏哈喇西倫山陰得爾錫勒圖山奇爾薩托羅海山巴顏哈喇嶺七山凡六百餘里皆南山一脈相屬入青海界內矣